

四庫全書

史部

欽定四庫全書

西湖志纂卷十

大學士梁詩正等輯

西溪勝蹟

西溪 在西湖之西西湖遊覽志過石人嶺為  
西溪萬厯杭州府志相傳宋高宗欲都其地後  
得鳳凰山遂云西溪且留下因稱留下俗訛為  
樓下云錢塘縣志西溪溪流深曲受餘杭南湖

之浸橫山環之凡三十六里支港繁多溝塍錯  
出有三路可入一由寶石山後陸行至秦亭山  
沿山十八里為宋時入洞霄宮之輦道一由仙  
姑山之西入青芝塢經法華山去北十里為西  
溪一水道由松木塢入古蕩溪流淺狹僅容小  
舟自古蕩以西並稱西溪羣山回繞曲水灣環  
沙渚蘆汀重重間隔置畧約以通行人有車馬  
所不能至者

葉紹翁西溪詩一條橫木過前溪  
邨女齊登採葉梯獨立衡門春雨

細白雞飛  
上樹梢啼

國朝康熙三十八年

聖祖仁皇帝南巡

駕幸西溪

御製五言詩一首

見恭紀  
名勝

遂禁樵採至今居民咸樂耕

漁之業而梅竹茶筍之利倍於他處故西溪之  
勝不獨在山水間也乾隆十六年三月初十日

聖駕巡幸



御製西溪詩

見恭紀  
名勝

臣沈德潛恭和 元韻

峻巖法華山升陟幾及頂回身俯西溪如練平  
鋪影言入梅花邨條然雞犬靜寒光聚幽壑空  
翠滴高嶺林中梵放清雲外鐘聲冷西湖一山  
隔喧寂分兩境喧極自歸寂入當發清省

法華山 在青芝塢北西溪梵隱志西湖北山  
一支其陽為竺國靈鷲其陰為法華有晉法華

僧靈蹟因以名山

龍駒山 在法華山旁一名龍師山

石壁山 咸淳臨安志與龍駒法華羣山連接  
不能盡名約高四十餘丈占十有餘里東抵西  
堰橋西至欽賢鄉

秦亭山 法華之分脉也杭州府志高百丈周  
迴三里山饒松竹楊梅薪篠在北山棲霞嶺後  
相傳祖龍駐馬於此又云秦少游築亭其上俗

訛蜻蜓山自此至留下稱沿山十八里為南宋

入禹航洞霄宮輦道

姜圖南過秦亭山詩秦亭斜日獨徘徊小艇初從河

渚來處處舟依蘆港宿家家門對竹溪閑避人野鷺聞聲去聽子莎雞接翅回乘興不辭邨路

遠為排寥寂一銜杯

塊泉 在秦亭山塊下故名泉出石罅甚甘

古蕩 在秦亭山西

王穉登古蕩詩曲水帶雲林鳩鳴綠樹陰藕陂魚百

石蠶市蘭千金鐘出花宮近舟行翠靄深桃花源不悞更擬後時尋

碧峯 在秦亭山西下有碧沙泉錢塘縣志其

北為洗馬灘

方井 在秦亭山西三里萬厯杭州府志相傳  
王方平飲此泉故名舊有亭宋米芾書額西溪  
梵隱志歲久亭圯明里人王槐重修刑部尚書  
洪鍾補書方井桃源嶺五字

花塢 在法華山之塢杭州府志以地多花故  
名

廟塢 塢中有東嶽廟故名西溪梵隱志廟前

雲木翳翳靈風颯然外潭魚黑脊而脣腹皆渥丹

龍歸塢 在龍駒山中西溪百詠序在西溪之東相傳宋建炎間高宗幸西溪見此塢清遠驅馬歸之塢由是名

石人塢 石人嶺之支錢塘縣志塢口為九沙大青嶺 在西溪之南錢塘縣志山田石澗逕竹巖松窈然森秀

河渚 在西溪南錢塘縣志本名南漳湖又曰  
蒹葭深處又曰渦水俗稱河水沙嶼縈迴秋深  
荻花如雪再進為深潭口四圍斷岸非棹不能  
渡

梅花泉 在九沙柏家園左萬厯錢塘縣志泉  
自地湧起作梅花瓣深不能尺灌十許頃田

千鈞池 在蔣侯廟前錢塘縣志周數百畝多  
大魚漁者可得千觔故俗名千觔池

金竹嶺 在石人嶺北西溪梵隱志竹皆作黃  
金色

白沙山 在金竹嶺傍

長流澗 在西溪東西溪梵隱志從白沙山金  
竹嶺迢遙曲折流至安樂橋雖亢旱而流不涸  
故名

白栗山 在留下西南三里錢塘縣志前為百  
丈里宋開慶間董氏築以通江干

東穆塢 在白栗山之東

趙西塢 在白栗山之西

安樂山 咸淳臨安志高三十丈周迴三里俗名唐家山

永興湖 在安樂山下錢塘縣志陂塘屈曲中植芰荷湖甚寬廣遊人載畫舫其中今半為葑田傍為永興寺

桐塢 在百丈里前即橫山界



瑪瑙池 在西溪南西溪百詠序出百丈源清

如碧龍池底細石圓秀狀如瑪瑙

荆山 錢塘縣志高二百丈周五里內有七十  
二賢人峯岡巒秀聳如削有荆山嶺兩溪夾山  
行匯於西溪

方山 一名金印山錢塘縣志高五十丈周四  
里凡七灣至頂乃方故名山巔怪石高皆數仞  
憑空突起諸山環遶為西溪最深處

三橋 在西溪上西溪梵隱志溪有橋三下多  
植柳濃陰夾道東西兩涯民居臨水花木周廬  
亦稱花市

金橋 在溪市北錢塘縣志建炎間金四將軍  
從張伯英戰死其妻歸舊廬築橋以資冥福鄉  
人稱為金四姥橋橋下垂柳獨盛

得仙橋 在龍歸塢西溪梵隱志紹興間有朱  
翁者不火食能前知坐橋而化橋跨小澗以仙

翁名

安樂橋

在唐家山西溪梵隱志安樂山下永

興寺外跨澗片石傳是宋僧濟顛所造

朱橋

錢塘縣志閒林埤黃山渡口南出十里

即朱橋江土人相傳朱橋是貴人朱清擔柴路

西溪山莊

在河渚前詹事高士奇別業康熙

三十八年

聖祖仁皇帝南巡

臨幸西溪由昭慶寺乘馬至木橋頭登舟從騎俱止橋外獨與內大臣泛小舟至其莊觀覽久之

御製題西溪山莊詩

花源路幾重柴桑皆沃土煙翠竹窓幽雪香梅苔古

御書竹窓二字

賜高士奇奉懸莊上

高士奇西溪山莊恭紀詩 華駒駐小橋 芝蓋停山路漾舟入隈

漁父徑紆

仙步修竹遮陰覆老梅自盤互

嵐光異昏曉鳥聲雜新故飄飄吹面風泣泣沾

衣露溪上舊柴桑乃邀 天子顧厥壤饒芻

荒原禽有雉兔乍春開總翠驂煖落繁絮登閣

豁 宸襟延賞得天趣感此不世遭山靈愜  
外遇又山莊紀 恩詩渚水灣環路淺深何期

潤壑陰雪蕊煙梢光 聖主一登臨勾陳暫駐溪橋外朗曜能迴  
睿藻竹窓梅嶼愜

宸襟 思輝振古真誰並珉石難鐫感激  
心又舊業重編枳棘籬漁邨漳樸只茅茨松齋

蘭畹何曾有嵐氣榛烟且自宜弱草長承垂露  
葉寒花盡發向陽枝何當 玉趾經過地干

載留傳  
際會奇

長慶堂 在河渚錢塘縣志梁貞明間有隱士

呂公建堂於此名曰長慶

洪園 在河渚東錢塘縣志明刑部尚書洪鐘

別業今餘地已屬他姓惟小邱猶存山石瓊瓏  
茂樹森蔭尚可登眺

橫山草堂 在六松林西溪梵隱志明洪元祚  
別業有醉山閣擁書樓竹浪居藏山舫皆佳勝  
處

西溪草堂 西溪梵隱志明祭酒馮夢禎別業  
陸莊 在河渚之北去秦亭山三里錢塘陸階  
奉母居此四面皆水非舟楫弗通由獨木橋穿

徑而入為白鳳書齋西有舫室臨半月池

宜園 錢塘縣志明司勳虞淳熙別墅

張園 在東嶽廟西名竺西草堂華亭張氏別業今廢

東嶽廟 在西溪法華山下咸淳臨安志宋乾道三年建錢塘縣志嘉定十三年史彌遠請於朝拓地重建寶慶三年落成劉需為記至今為杭郡嶽廟之冠

屠墟廟 在古蕩瀕河額題古靈昭廟神為宋

勅封屠墟靈昭侯蓋社祠也

吳焯靈昭廟宋碣考秦亭道中有古

靈昭廟廊下卧殘碣半段首行存尚書省三字其文細書多漶漫可讀者猶數百字乃宋理宗淳祐七年里人請於廟得封立廟稱屠墟者以神著靈時赤幟見火光中有屠墟二字而靈昭者宋時所封之號也考咸淳臨安志失載此廟國朝康熙間所立新碑直書神為蜀主劉璋字季玉按蜀志本傳璋襲父焉為益州牧後加振威將軍不聞王蜀未知今碑何据而云然也碣中字之可辨者但述神靈異事雖隱約有劉璋字似難以蜀主稱之廟近境泉秦亭山當其面



石廟 在西穆塢內西溪百詠序神為五代石  
晉子孫遂稱石廟廟前有古松大可十圍相傳  
同時所植

蔣侯廟 在千勛池北夢梁錄神姓蔣名崇仁  
弟崇義崇信樂於賑施力行善事里人立祠表  
其德錢塘縣志宋咸淳三年賜廟額曰廣福六  
年封侯爵曰孚順孚惠孚祐廟在鹽橋為神故  
居西溪地名蔣邨即神苗裔而祀於其鄉者

章神術 在馬池南西溪梵隱志相傳宋咸淳間有章姓者勇敢有力聞賊兵過溪時方舂米即頭戴石臼手持石杵大呼而出兵皆散去溪民無擾人皆稱得勝章相公今祀為土神

宋禁酒牌 萬厯杭州府志留下西南三里有宋高宗禁酒牌曰不為酒稅處

陶家廟 咸淳臨安志理宗時有陶處士隱此有栗里風居民遂成村落

楊圩 在西溪北西溪百詠序宋有功臣楊統  
制者世居錢塘兄弟友愛各種一圩之田因名  
周陸隱居 西溪百詠序宋隱者周士民茂叔  
之裔有山園在耕南塢堂名草窓又四明象山  
陸氏子乃子靜之裔家於卧象山下軒曰寓目  
又築望雲臺今惟陸家橋存焉

淨業堂 在秦亭山武林梵志為靜性下院地  
饒竹箭名萬竹淨業堂孫克弘書額曰香界莊

嚴

普慈院 在秦亭山武林梵志嘉靖初建

佛惠禪寺 在方井武林梵志晉天福七年普

覺一禪師開山為法華祖師道場

宋紹興間請今額西溪梵隱志明永樂間重建  
別院名白業堂

上乘院 在西溪東梅花塢中咸淳臨安志唐  
貞觀十九年建舊名龍居宋治平間重建改今

額有寂觀堂

古法華寺

在西溪東法華山下西溪梵隱志

明隆慶間雲間鄭昭服捨宅為精舍號雲棲別

墅俗呼鄭菴崇禎間郡守龐承寵題古法華寺

崇真院

在西溪之南咸淳臨安志天福六年

吳越王建舊名永福宋治平二年改今額西溪

百詠序柵橋東有小真菴明崇禎間重建於溪

南

龍歸院 在龍歸塢西溪志宋紹興間高宗幸  
洞霄宮經此改清化寺為龍歸院僧佛印禪誦  
之堂也西溪梵隱志明萬厯中廣陵僧真一自  
補陀來購邱氏園基結菴廚有古井味甘冽名  
菩薩泉初名西方菴改稱古龍歸院

大蘇林 在西溪法華山之陽錢塘縣志舊為  
吳越王將臺錢氏納土後改為趙山寺初名彌  
陀菴明萬厯中更名大蘇林

曲水菴 在正等院左錢塘縣志即古清化寺

舊址明崇禎初雲棲古德法師建

蘆菴 在曲水菴右即正等院咸淳臨安志紹

興中侍衛馬軍司駐屯於此建屋以奉諸軍香

火西溪梵隱志萬厯初年正等寺僧如覺因龍

歸塢遷此董其昌題曰交蘆蓋取經根塵識三

都無實性同於交蘆之義亦以菴構蘆中直名

蘆菴

秋雪菴 在西溪東蒹葭深處原名資壽院咸

淳臨安志原名大聖菴淳熙七年請今額西溪梵  
隱志宋潼川軍節度所立水周四隅蒹葭彌望  
花時如雪明陳繼儒題曰秋雪

福清菴 在安樂山前西溪梵隱志唐中和間  
性空禪師開山宋隱士邁子山過院有花覆石  
橋閒戲馬葉齊山寺亂鶯啼之句後圯明萬歷  
間復建



夕照卷

在石人嶺下西溪百詠序晉咸和間

靈隱慧理禪師退隱於此周顯德間廢宋祥符

間復興

永興寺

在安樂山下萬厯錢塘縣志唐貞觀

間建西溪志悟明尊者開山晉天福間僧宣大

章住此釋法華經宋鐵牛印禪師重葺西溪梵

隱志明萬厯初馮夢禎太史延僧真麟新之手

植綠萼梅二本題其堂曰二雪

李流芳永興寺寄懷詩人言西

溪梅不道西溪竹試問十里香何如萬頃綠夾  
道飛流喧出雲兩山矗永興好蘭若平疇帶溪  
曲梅竹正蕭森岡陵互綿邈登樓攬幽香故人  
有書屋我昨至雲樓遇君南屏麓誇我此中來  
已足享清福今朝翻白沙崎嶇歷山谷我來適  
君去恨不同信宿勝事各自領我遊恐難續終  
當期汗漫相與謝鸞東

福勝院 在安樂山麓西溪梵隱志晉天福間

吳越王建宋僧困本澄重興遶寺栽梅故有福

勝梅花之目元末兵燬明萬厯中雲棲僧大善

重構顏曰谿巢崇禎間仍改名福勝院

永樂菴 在西溪西南森羅塢西溪百詠序宋  
紹興中有梵僧阿利真負經西來隱此得道元  
末兵燬明萬厯間重建崇禎間復舊額

報先明覺院 在佛惠寺北咸淳臨安志建隆  
二年吳越王建舊名報先治平二年改今額有  
虛心軒西溪百詠序諺云千年靈隱八百報先  
蓋唐寺也歲久傾圮萬厯間重建寺有恒如禪  
師習天台教四十年不出山誦法華經六千餘

部

玉池菴

在塔塢內西溪梵隱志崇禎己卯僧

洪遠葺

指華菴

在龍歸塢西溪梵隱志崇禎二年祖

山寺僧智授建

法華律院

在西溪路北西溪梵隱志嘉靖中

東暉曉禪師建里人金長臣施地俗呼金家菴

慈覺菴

在秋雪菴東西溪梵隱志萬曆中僧

性禪構精舍號省菴崇禎己卯僧智海養母其  
中雲棲古德法師為改名慈覺謂其孝行可方

古慈覺法師云

錢士升贈慈覺菴立雲詩昔日  
參承曲水邊拈來禪淨理雙圓

而今說法依然在  
翠竹蒼葭帶晚煙

清溪道院

在安樂山下西溪梵隱志唐寶歷

間羽士費元真開山宋徐提舉隱此

臣謹按西溪水道甚多途徑四出難以依路順  
叙故遊覽志總為一路而勝蹟畧焉茲謹照雍  
正九年新志類叙以  
補田志所未備云





西湖志纂卷十

欽定四庫全書

史部

西湖志纂卷十一

詳校官左都御史<sub>臣</sub>李綬

編修<sub>臣</sub>程嘉謨覆勘

總校官進士<sub>臣</sub>朱鈐

校對官主事<sub>臣</sub>武懋崇

謄錄監生<sub>臣</sub>孫瑛



欽定四庫全書

西湖志纂卷十一

大學士梁詩正等輯

藝文

錢塘湖石記

唐

白居易

錢塘湖一名上湖北有石函南有笕凡放水溉田每減一寸可溉十五餘頃每一復時可溉五十餘頃先須別選公勤軍吏二人立於田次與本所由田戶據頃畝定

日時量尺寸節限而放之若歲旱百姓請水須令經州  
陳狀刺史自便押帖所由即日與水若待狀入司府下  
縣縣帖鄉鄉差所由動經旬日雖得水而旱田苗無及  
也大抵此州春多雨秋多旱若隄防如法蓄洩及時即  
瀕河千餘頃田無凶年矣自錢塘至鹽官界應溉夾官  
河田須放湖水入河從河入田準鹽鐵使舊法又須先  
量湖水淺深待溉田畢即還本水尺寸往往旱甚即湖  
水不充今年修築河隄高加數尺水亦隨加即不啻足

矣脫或不足即更決臨平湖添注官河又有餘矣俗云  
決放湖水不利錢塘縣官縣官多假他詞以惑刺史或  
云魚龍無所托或云菱芡失其利且魚龍與生民之命  
孰急菱芡與稻粱之利孰多斷可知矣又云放湖即郭  
內六井無水亦妄也且湖底高井管低湖中又有泉數  
十眼湖耗則泉湧雖盡竭湖水而泉用有餘況前後放  
湖終不致竭而云井無水謬矣其郭中六井李泌相公  
典郡日所作甚利於人與湖相通中有陰竇往往堙塞

亦宜數察而通理之則雖大旱而井常足湖中有無稅田約十數頃湖淺則田出湖深則田沒田戶多與所由計會盜洩湖水以利私田其石函南窰并諸小窰非澆田時並須封閉築塞數令巡檢小有漏洩罪責所由即無盜洩之弊矣又若霖雨三日以上即往往隄決須所由巡守為之預防其窰之南舊有缺岸若水暴漲即於缺岸洩之又不可減兼於石函內窰洩之防隄潰也大約水去石函口一尺為限過此須洩之予在郡三年仍歲

逢旱湖之利害盡究其由恐來者要知故書於石欲讀  
者易曉故不文其言

冷泉亭記

白居易

東南山水餘杭郡為最由郡言靈隱寺為尤由寺觀冷  
泉亭為甲亭在山下水中央寺西南隅高不倍尋廣不  
累丈而撮奇得要地搜勝槩物無遁形春之日吾愛其  
草薰薰木欣欣可以導和納粹暢人血氣夏之夜吾愛  
其泉淙淙風泠泠可以蠲煩析醒起人心情山樹為蓋

崖石為屏雲從棟生水與階平坐而玩之者可濯足於  
牀下卧而狎之者可垂釣於枕上矧又潺湲潔澈粹冷  
柔滑若俗士若道人眼耳之塵心舌之垢不待盥滌見  
輒除去潛利陰益可勝言哉斯所以最餘杭而甲靈隱  
也杭自郡城抵四封叢山複湖易占形勝先是領郡者  
有相里君造虛白亭有韓僕射臯作侯仙亭有裴庶子  
常棣作觀風亭有盧給事元輔作見山亭及右司郎中  
河南元龜最後作此亭於是五亭相望如指之列可謂

佳境殫矣能事畢矣雖有敏心巧目無所加焉故吾繼  
之述而不作

胥山祠銘

唐  
盧元輔

有吳行人伍公子胥陪吳之職得死直言千五百年廟  
貌不改漢史遷曰胥山今云青山者謬也夫差既王宰  
嚭受賄太伯廟血將乾闔閭劍光先失公朝焉晏焉入  
則諫焉屬鏤之賜竟及其身鷗夷盛屍投於水濱憤悱  
鼓怒配濤作神迄今一日再至海鷗羣飛陽侯夾從仲

秋闕望杭人以旗鼓逐之百城聚觀大耀威靈蕩滌千  
里洪波砥平有滑有脂有鹹有腥遥實乎下庭山海梯  
航雞林扶桑交臂乎卯階金狄在戶雷鼓在堂魏尊漢  
豆六代笙簧可謂奉天爵之馨香獲神人之盛禮佐皇  
震怒驅叱大邪萬里永清人觀斗氣銘曰矯矯伍員執  
弓挾矢仗其實劍以謂吳子赫赫王閭實聽奇謨錫之  
金鼓以號以誅後王嗣立執書不泣顛越言潤宰詬讒  
輯步光欲飛姑蘇待執吾則切諫抉眼不入投於江上



自統波濤晝夜兩至懷沙類騷洗滌南北簸蕩東西夷  
蠻卉服罔敢不來雖非命祀不讓瀆濟帝帝王王代代  
明明表我忠哉

有美堂記

宋 歐陽修

嘉祐二年龍圖閣直學士尚書吏部郎中梅公出守餘  
杭於其行也天子寵之以詩於是作有美之堂蓋取賜  
詩之首章而名之以為杭人之榮然公之甚愛斯堂也  
甚久而不忘今年自金陵遣人走京師命余誌之其請

至六七而不倦余乃為之言曰夫舉天下之至美與其樂有不得而兼焉者多矣故窮山水登臨之美者必之乎寬閒之野寂寞之鄉而後得焉覽人物之盛麗誇都邑之雄富者必據乎四達之衝舟車之會而後足焉蓋彼放心於物外而此娛意於繁華二者各有適焉然其為樂不得而兼也今夫所謂羅浮天台衡岳廬阜洞庭之廣三峽之險號為東南奇偉秀絕者乃皆在乎下州小邑僻陋之邦此幽潛之士窮愁放逐之臣之所樂也

若乃四方之所聚百貨之所交物盛人衆為一都會而  
又能兼有山水之美以資富貴之娛者惟金陵錢塘然  
二邦皆僭竊於亂世及聖宋受命海內為一金陵以後  
服見誅今其江山雖在而頽垣廢址荒煙野草過而覽  
者莫不為之躊躇而悽愴獨錢塘自五代時知尊中國  
効臣順及其亡也頓首請命不煩干戈今其民幸富完  
安樂又其俗習工巧邑屋華麗蓋十餘萬家環以湖山  
左右映帶而閩商海賈風帆浪舶出入於江濤浩渺煙

雲杳靄之間可謂盛矣而帥是邦者必皆朝廷公卿大臣若天子之侍從又有四方遊士為之賓客故喜占形勝治亭榭相與極遊覽之娛然其於所取有得於此者必有遺於彼獨所謂有美堂者山水登臨之美人物邑居之繁一寓目而盡得之蓋錢塘兼有天下之美而斯堂者又盡得錢塘之美焉宜乎公之甚愛而難忘也梅公清謹好學君子也視其所好可以得其人焉

乞開杭州西湖狀

宋

蘇軾

杭州之有西湖如人之有眉目蓋不可廢也唐長慶中白居易為刺史方是時湖溉田千餘頃及錢氏有國置撩湖兵士千人日夜開濬自國初以來稍廢不治水涸草生漸成葑田熙寧中臣通判杭州湖之葑合者蓋十二三耳而今十六七年之間遂湮塞其半父老皆言十年以來水淺葑積如雲翳空倏忽便滿更二十年無西湖矣使杭州無西湖如人去其眉目豈復為人乎臣愚無知竊謂西湖有不可廢者五天禧中故相王欽若奏

以西湖為放生池禁捕魚鳥為人主祈福每歲四月八日郡人數萬會於湖上所活羽毛鱗甲以百萬計皆西向稽首仰祝萬壽若一旦湮塞使蛟龍魚鼈同為枯轍之鮒臣子坐觀亦何心哉此西湖不可廢者一也杭之為州本江海故地水泉鹹苦居民零落自李泌引湖水作六井然後民足於水井邑日富百萬生聚待此而後食今湖狹水淺六井漸壞若二十年後盡為葑田則舉城皆食鹹苦其勢必自耗散此西湖不可廢者二也白

居易作石函記云放水溉田瀕河千頃可無凶歲今雖不及千頃而下河數十里芟菱穀米所獲不貲此西湖不可廢者三也西湖深闊則運河可取足於湖水若湖水不足則必取足於江潮江潮所過泥沙渾濁一石五斗不出三歲輒調兵夫十餘萬開濬而舟行市中蓋十餘里士卒騷擾泥水狼籍為居民大患此西湖不可廢者四也天下官酒之盛未有如杭州者也歲課二十餘萬緡水泉之用仰給於湖若湖漸淺狹水不應溝則當

勞人遠取山泉歲不下二十萬工此西湖不可廢者五也臣輒已差官打量湖上葑田計二十五萬餘丈度用夫二十餘萬工近者伏蒙陛下以本路饑饉特寬轉運司上供額斛五十餘萬石出糶常平米亦數十萬石又特賜本路度牒三百而杭當得百道臣謹以聖意增價召人中米減價出賣以濟饑民而增減耗折之餘尚得錢米約共一萬餘貫石臣輒以此錢募民開湖度可得十萬工自今四月二十八日興工農民父老縱觀嘆息



以為陛下既捐利與民活此一方而又以其餘興久廢  
無窮之利使數千人得食其力以度此凶歲蓋有泣下  
者臣伏見民情如此而錢米有限所募未廣葑合之地  
尚有大半若來者不繼則前功復棄深可痛惜若更得  
度牒百道則一舉募民除去淨盡不復遺患矣陛下察  
臣五不可廢之狀利害較然特出聖斷別賜臣度牒五  
十道仍飭轉運提刑司於前來所賜諸州二百道內契  
勘賑濟支用不盡者更撥五十道價錢與臣通成一百

道使臣得盡力畢工半年之間自見西湖復唐之舊環  
三十里際山為岸則農民父母與羽毛鱗介同沐聖澤  
無有窮已臣不勝大願謹錄奏聞

表忠觀碑

蘇軾

熙寧十年十月戊子資政殿大學士右諫議大夫知杭  
州軍州事臣朴言故吳越國王錢氏墳廟及其父祖妃  
夫人子孫之墳在錢塘者二十有六在臨安者十有一  
皆蕪穢不治父老過之有隕涕者謹按故武肅王鏐始

以鄉兵破走黃巢名聞江淮復以八郡兵討劉漢宏并  
越州以奉董昌而自居於杭及昌以越判則誅昌而并  
越盡有浙東西之地傳其子文穆王元瓘至其孫忠獻  
王弘佐遂破李景兵取福州而弘佐之弟忠懿王俶又  
大出兵攻景以迎周世宗之師其後卒以國入覲三世  
四王與五代相終始天下大亂豪傑蠭起方是時以數  
州之地盜名字者不可勝數既覆其族延及於無辜之  
民罔有孑遺而吳越地方千里帶甲十萬鑄山煮海象

犀珠玉之富甲於天下然終不失臣節貢獻相望於道  
是以此民至於老死不識兵革四時嬉遊歌舞之聲相  
聞至於今不廢其有德於斯民甚厚皇宋受命四方僭  
亂以次削平西蜀江南負其險遠兵至城下力屈勢窮  
然後束手而河東劉氏百戰守死以抗王師積骸為城  
灑血為池竭天下之力僅乃克之獨吳越不待告命封  
府庫籍郡縣請吏於朝視去其國如去傳舍其有功於  
朝廷甚大昔竇融以河西歸漢光武詔右扶風修理其

父祖墳塋祀以太牢今錢氏功德殆過於融而未及百年墳廟不治行道傷嗟甚非所以勸獎忠臣慰答民心之義也臣願以龍山廢佛寺曰妙音院者為觀使錢氏之孫為道士曰自然者居之凡墳墓之在錢塘者以付自然其在臨安者以付其縣之淨土寺僧曰道微歲各度其徒一人使世掌之籍其地之所入以時修其祠宇封殖其草木有不治者縣令丞察之甚者易其人庶幾永終不墜以稱朝廷待錢氏之意臣抃冒死以聞制曰

可其妙音院改賜名曰表忠觀銘曰天目之山苕水出  
焉龍飛鳳舞萃於臨安篤生異人絕類離羣奮挺大呼  
從者如雲仰天誓江日月晦蒙强弩射潮江海為東殺  
宏誅昌奄有吳越金券玉冊虎符龍節大城其居包絡  
山川左江右湖控引島蠻歲時歸休以燕父老曄如神  
人玉帶裘馬四十一年寅畏小心厥篚相望大貝南金  
五朝昏亂罔堪托國三王相承以待有德既獲所歸弗  
謀弗咨先王之志我惟行之天祚忠孝世有爵邑允文

允武子孫千億帝謂守臣治其祠墳無俾樵牧愧其後  
昆龍山之陽巋然新宮匪私於錢惟以勸忠非忠無君  
非孝無親凡百有位視此刻文

錢塘六井記

蘇軾

潮水避錢塘而東擊西陵所從來遠矣沮洳斥鹵化為  
桑麻之區而久乃為城邑聚落凡今州之平陸皆江之  
故地其水苦惡惟負山鑿井乃得甘泉而所及不廣唐  
宰相李公長源始作六井引西湖水以足民用後刺史

白公樂天治湖浚井刻石湖上至今賴之始長源六井  
其最大者在清湖中為相國井其西為西井少西而北  
為金牛池又北而西附城為方井為白龜池又北而東  
至錢塘縣治之南為小方井而金牛之廢久矣嘉祐中  
太守沈公文通又於六井之南絕河而東至美俗坊為  
南井出湧金門並湖而北有水閘三注以石溝貫城而  
東者南井相國方井之所從出也若西井則相國之派  
別者也而白龜池小方井皆為匿溝湖底無所用閘此



六井之大略也熙寧五年秋太守陳公述古至始問民之所病皆曰六井不治民不給於水南井溝庫而井高水行地中率常不應公曰嘻甚矣吾在此可使民求水而不得乎乃命僧仲文子珪又引其徒如正思坦以自助凡出力以佐官者二十餘人於是發溝易甃完輯罅漏而相國之水大至坎滿溢流南注於河千艘更載瞬息百斛以方井為近於濁惡而遷之少西不能五步而得其故基父老驚曰此古方井也民李甲遷之於此六

十年矣疏湧金池為上中下使澣衣浴馬不及於上池而列二閘於門外其一赴三池而決之河其一納之石檻比竹為五管以出之並河而東絕三橋以入於石溝注於南井水之從來高則南井常厭水矣凡為子閘四皆垣牆扃鐫以護之明年春六井畢修而歲適大旱自江淮至浙東井皆竭民至以罌缶貯水相餉如酒醴而錢塘之民肩足所任舟楫所及南出龍山北至長河鹽官海上皆以飲牛馬給沐浴方是時汲者皆誦佛以祝

公余以為水者人之所甚急而旱至於井竭非歲之所常有也以其不常有而忽其所甚急此天下之通患也豈獨水哉故詳其語以告後之人使雖至於久遠廢壞而猶有考也

臣謹按杭城自宋以來爭言治井至南渡後乾道咸淳間猶一再修舉見於河渠記載者不一因江與城近民患斥鹵雖處水鄉而常乏於水嗣後江勢漸遠漸狹湖水灌輸浸淫日久土性已易城中新開甘井甚多不專藉六井沈公井矣故元以後言水利者不及治井

六一泉銘

井序

蘓軾

歐陽文忠公將老自謂六一居士予昔通守錢塘見公於汝陰而南公曰西湖僧慧勤甚文而長於詩吾昔為山中樂三章以贈之子間於民事求人於湖山間而不可得則往從勤乎予到官三日訪勤於孤山之下抵掌而論人物曰公天人也人見其暫寓人間而不知其乘雲馭風歷五嶽而跨滄海也此邦之人以公不一來為恨公麾斥八極何所不至雖江山之勝莫適為主而奇麗秀絕之氣常為能文者用故吾以謂西湖蓋公几案

間一物耳勤語雖幻怪而理有實然者明年公薨予哭  
於勤舍又十八年予為錢塘守則勤亦化去久矣訪其  
舊居則弟子二仲在焉畫公與勤之像事之如生舍下  
舊無泉予未至數月泉出講堂之後孤山之趾汪然溢  
流甚白而甘即其地鑿巖架石為室二仲謂予師聞公  
來出泉以相勞苦公可無言乎乃取勤舊語推本其意  
名之曰六一泉且銘之曰泉之出也去公數千里後公  
之歿十有八年而名之曰六一不幾其誕乎曰君子之

澤豈獨五世而已蓋得其人則可以至於百傳嘗試與  
子登孤山而望吳越歌山中之樂而飲此水則公之遺  
風餘烈亦或見於斯泉也

遊龍井記

宋 秦觀

龍井舊名龍泓距錢塘十里吳赤烏中方士葛洪嘗煉  
丹於此事見圖記其地當西湖之西浙江之北風篁嶺  
之上實深山亂石中之泉也每歲旱禱雨輒應故相傳  
以為有龍居之然泉者山之精氣所發也西湖深靚空

闊納光景而涵煙霏菱芡荷花之所附麗龜魚鳥蟲之  
所憑依漫衍而不迫紆餘以成文陰晴之中各有奇態  
而不可以言盡也故岸湖之山多為所誘而不克以為  
泉浙江介於吳越之間一晝夜濤頭自海而上者再疾  
擊而遠馳兕虎駭而風雨怒過者摧當者壞乘高而望  
之使人毛髮盡立心掉而不禁故岸江之山多為所脇  
而不暇以為泉惟此泉蟠幽而踞阻內無靡蔓之誘以  
散越其精外無豪悍之脇以虧疏其氣故嶺之左右大

率多泉龍井其尤者也元豐二年辨才法師元靜退休於此山之壽聖院院去龍井一里凡山人有事於錢塘與遊客之至壽聖者皆取道井旁法師乃即其處為亭又率其徒以浮屠法環而咒之庶幾有慰夫所謂龍者俄有大魚自泉中躍出觀者異焉然後知井之有龍不謬而其名由此益大聞於時是歲余自淮南如楚省親過錢塘訪法師於山中法師策杖送予於風篁嶺之上指龍井曰此泉之德至矣美如西湖不能淫之使遷壯



如浙江不能威之使屈受天地之中資陰陽之和以養其源推其緒餘以澤於萬物雖古有道之士又何以加於此

浙江觀潮賦

宋

羅公升

羅子客於錢塘適時仲秋皓月初缺長空閒寥萬里清絕乃江臯乎逍遙想故國之餘烈已而金鏃聲轟轂戛蹄踣鷖塵漲天鬪艇彌澤行雲低回而不飛山川蒼茫而異色羅子怪而問之客曰子獨不聞錢塘之潮乎天

地之間有高有深有明有晦有動有植有常有怪賦形而立者以億計而海為大海之大浮人間其如空與太虛而為對其變化翕忽一日萬狀而錢塘之潮為最錢塘之潮捲海山吞吳會力拔寰中聲出天外其瑰偉傑特之觀亘萬古信四時而八月既望為快方潮之未至也乾坤為爐陰陽為鞴一元之氣秋高而益盈望舒之精霸生而變態倒河海於累空納萬流於一噫陽侯捲波其欲立百神嚴駕今有待及潮之既至也怒如驚霆

疾若飛雨日車為之掀簸風師助其呼舞我今層冰  
之來千里飛雪洶洶兮萬馬之奔四合如堵倏谷變以  
陵遷恐山摧而嶽仆見者膽落聞者毛豎於是賁育之  
倫虓虎之士因茲水嬉以習戰事揆文舫建彩標破驚  
湍逐駭猋駕蛟蜃以為車履鯨鯢而成橋大鼓搥靈鼉  
之革修竿曳鮫人之綃三山為陸陽谷為徼縱橫南北  
合散先後鬼沒神出鱗甲相弔或擁蓋以高驤或援戈  
而疾剽或觀海若而分餘甘或叩珠宮而逢一笑歡聲

達於淮濡餘風騰乎越嶠層瀾既平鼓音未息掣鰲首  
耀鯤脊洗月窟探地極馮夷驚游龍矧呂梁丈人陟降  
乎左右蓬邱仙人逢迎於咫尺此闔閭夫差之所以雄  
長百蠻憑陵上國也是日也朝者休務賈者輟市贏糧  
而快覩者累屬乎八九百里雞林日本琉球閩婆萬斛  
之舟卯發而辰至朝采夜光珊瑚火齊希世之珍山積  
而雲委茂先所不能識弘羊所不能計此真天下之巨  
麗也今子重趼百舍來游三吳蓋將覽江山之偉奇供

筆墨於游戲亦有樂於此乎羅子遽然變色曰此固吾  
之所以弔也而子所以樂乎且方全吳之時左滄海以  
為池右梁山以為郭內重湖以為襟帶外長淮以為籬  
落水犀萬艘石城百仞乘車踵申公之策伏軾藉延陵  
之信子胥運籌於帷幄孫武受鉞於行陣前茅未啓中  
原已震談笑舉六千里之楚指揮壓四十縣之晉宋子  
齊姜嫄至於後宮魯壺鄭縞雨集於主進迨夫孽臣擅  
朝艷妾供寢長虎狼於肘腋進蜡毒於燕飲酣歌忘中

庭之呼利口弛重關之禁積薪已然盲者安枕爰有一  
老身佩宗社觀大厦之歌傾恣寒蟬之瘖啞乃逆鱗之  
屢批竟屬鏤之不赦豈九州之莫容恥中道而更駕人  
生得死其實難猶有以見先王於地下鷗夷朝浮越甲  
暮入棲烏之曲未終至德之廟已泣角東之徒胡顏館  
娃之行莫繫委鍾虞於瓦礫嘯漁樵於都邑層臺鬼哭  
而燐明榮楣獸號而鳥集於是忠魂上訴帝閭朝啓乃  
錫命書以長茲水乘象載之輿策玉虬之駟魚須前驅

龍伯作使凡排山倒海之威皆鞭荆棲越之氣且夫骨  
體之臣生死一節豈生不忍去其故都而死乃致憾於  
宗國彼濤頭之所指寧强弩之能移想乘波而東擊猶  
遺恨於會稽薦馨香而知痛競簫鼓以為嬉雖千秋萬  
歲之來歸恐滄海桑田之增悲也嗚呼自有天地即有  
此江如此潮汐閱幾興亡較朝菌於大椿竟孰短而孰  
長昔祖龍之虎視拾六國其若芥擁萬乘以絕江投馬  
筌而填海曾勒功之未能已旁觀之欲代況乎吳越直

兩蝸角并吞割據不出掌握朝弁冕於廟堂夕螻蟻於  
溝壑諒遺迹之幾何不足供談笑者之一噓惟夫殺身  
成仁終古不朽橫大江以揚靈真不亡而曰壽彼舍義  
以取生徒含羞而遺臭觀乎斯潮媿汗乃走故吾謂明  
月之夕慶雲之朝澍雨降瑞雪飄名山大川清泉怪石  
之流峙奇花異卉嘉禾美竹之天喬皆忠臣孝子賢士  
大夫精神之所寓而況於潮乎客乃太息反顧落日覺  
悲風之四起忽洪濤之俱失



虎跑泉銘

并序

明 宋 濂

虎跑泉在杭之南山大慈定慧禪院距城十里而近唐  
元和十四年性空大師來遊茲山樂其靈氣盤鬱棲禪  
其中尋以無水將他之忽神人跪而告曰自師之來我  
等邀惠者甚大奈何棄去南岳童子旋當遣二虎來移  
師無憂也翼日果見二虎跑山出泉甘冽勝常大師因  
留建立伽藍蘇文忠公守杭為之賦詩有虎移泉眼趁  
行腳之句蓋紀實也師名寰中蒲坂盧氏子得法於百

大海一時龍象如南泉願臨濟元趙州諗巖頭巖雪峯  
存無著喜欽山遠咸來咨叩道要則其德服鬼神彰灼  
靈異有不難致者於乎拔劍刺山水為之湧折腰拜井  
泉乃仰流武夫健將一誠之所格尚若此況大師心悟  
無際者乎洪武戊午冬十有一月濂朝京師道經山下  
今主僧定巖戒有道之士也邀濂觀泉且披法衣率其  
徒同舉梵咒久之泉感沸而出若聯珠焉已而微作湧  
勢濂心異之遂為作銘銘曰天一所形厥質乃凝潛行

重淵與勢俱升至人來居地不愛寶誰信清泠生於虎  
爪山后川君與道為謀肯私一勺不師之留師既留止  
化泉為雨式沛且滂潤於千里幻此荒墟遂成寶坊羣  
生依之為正法幢命世大才猶龍類象來游來咨如山  
答響代祀雖邈聲華勿虧至今草木尚被餘輝我於世  
緣逢觸輒礙泉特相知獻萬珠球擾擾征驂風埃渺瀰  
有素者衣化而為緇願挹寸波如習禪定洗滌根塵一  
時清淨

西湖修復石堰記

明 李 旻

武林諸山之水匯為西湖西北際山東至錢塘湧金二門之城下瀕湖數千百家為稼為圃為池以畜魚皆湖是資窮民釣弋網罟衣食於湖者不可勝紀餘波所及為六井為清湖河達於運河城外並河之田千頃賴以灌溉湖所利濟如此白樂天通石函蘇子瞻築石堰所以鍾其源而節其流用意深矣石函之流細故曰減水一寸可溉田十五頃每一復時可及五十頃此蓄洩之

節目而溉田之大較也若石堰則所堰有一定之則日夜長流其流入於運河雖有霖雨暴漲不使驟溢以為瀕湖之害無餘則蓄而待石函之洩函與堰不可偏廢也後之人不深維其意壞堰而易之以版由是守者得以為奸漲溢乃靳而不啓旱則啓而竭之遂因而取貨焉為湖之病數十年於茲矣弘治丁巳監察御史吳君一貫巡按浙江以興利除患為已任予告之由君謀於都水主事姚君文灝欲復其舊適安福胡君道以進士

來知錢塘縣事遂以屬之胡君詢之鄉老相與求之故  
迹因地勢測水平定其高卑之準鳩工琢石不日告成  
瀕湖上下之人一旦獲享舊日之利而除其害莫不懽  
忻鼓舞嘆頌功德羣告予請書其事於石予嘗謂長源  
樂天巨川子瞻諸君子皆古今所稱偉人其才識宦業  
俱非尋常可及而在郡必汲汲於西湖者豈遊觀之樂  
足以動其心哉亦惟因民之所利而利之特加之意云  
數百年來郡乘書之民庶歌之詩人賦咏之至於今未

已蓋惠利之決於人心自能不泯滅焉爾後之視今亦猶今之視昔然則石堰之復其係於人心之思當何如哉余郡人也樂為斯民道之是為記

請開西湖奏議

明楊孟瑛

杭州地脉發自天目羣山飛翥駐於錢塘江湖夾抱之間山傳水聚元氣融結故堪輿之書有云勢來形止是為全氣形止氣蓄化生萬物又云外氣橫形內氣止生故杭州為人物之都會財賦之奧區而前賢建立城郭

南跨吳山北兜武林左帶長江右臨湖曲所以全形勝而固脉絡鍾靈毓秀於其中若西湖占塞則形勝破損生殖不繁杭城東北二隅皆鑿壕塹南倚山嶺獨城西一隅瀕湖為勢殆天塹也是以湧金門不設月城實倚外險若西湖占塞則塹術綿連容奸資寇折衝禦侮之便何藉焉唐宋以來城中之水皆藉湖水充之今甘泉甚多固不全仰六井南井也然實湖水為之本源陰相輸灌若西湖占塞水脉不通則一城將復鹵飲矣況前



賢興利以便民而臣等不能纂已成之業非為政之體也五代以前江潮直入運河無復遮捍錢氏有國乃置龍山浙江兩閘啓閉以時故泥水不入宋初傾廢遂至淤壅頻年挑濬蘇軾重修堰閘阻截江潮不放入城而城中諸河專用湖水為一郡官民之利若西湖占塞則運河枯澁所謂南柴北米官商往來上下阻滯而關闕貿易苦於擔負之勞生計亦窘矣杭城西南山多田少穀米蔬果之需全賴東北其上塘瀕河田地自仁和至

海寧何止千頃皆藉湖水以救亢旱若西湖占塞則上塘之民緩急無所仰賴矣此五者西湖有無利害明甚第壞舊有之業以傷民心怨讟將起而臣等不敢顧忌者以所利於民者甚大也

西湖遊覽志序

明 田汝臣

海上之士往往談蓬萊三島之勝恍惚渺茫莫可踪跡豈若西湖重青淺碧抱麗城闐陸走水浮咸可涉覽況帝都之餘藻飾華富即海上之士所稱珠宮貝闕琪樹

瓊花當不過此宜乎勝甲寰中聲聞華服也然海內名山率皆有志而西湖獨無詎非闕典曩五岳山人黃勉之嘗謂予曰西湖無志猶西子不寫照霓裳不按譜也子盍圖之時子敬諾而五六年前宦遊無暇迨乎宅憂除服聊寓目焉風景不殊良朋就世言猶在耳負約已長因念古人踰祥授琴將以舒其菟結聞籟作賦用以感於幽冥予不敏竊比山水於笙歌擬佔畢以酬諾一物二義爰契我心於是紬集見聞再證履討輯撰此書

叙列山川附以勝跡揭綱統目為卷者二十有四題曰  
西湖遊覽志裁剪之遺兼收並蓄分門彙種為卷者二  
十有六題曰西湖遊覽志餘客有病予此書多述遊冶  
之事歌舞之談導慾宣奢非以長化也予則以為志者  
史家之一體也史不實錄則觀者何稽焉故泰華終南  
守國者恃為金湯之固武夷雁蕩棲真者隱為解化之  
區嶽麓鵞湖講學者闢為都授之所西湖三者無一居  
焉而欲諱遊冶之事歌舞之談假借雄觀祇益浮偽耳

史家不為也客又病予此書名繫西湖而旁及城市覈實不符予則以為西湖者南北兩山之秀液也南北兩山者西湖之護沙也滋靈釀淑條貫同之若非元本山川要原別委則西湖之全體不章故旁及城市正以摹寫西湖也學使文谷孔公嘗覽而嘉之曰殆郡史也美刺具陳欲為錄傳而以憂去侍御紀山曹公亦欲錄傳而復以憂去至是侍御劍泉鄢公按部兩浙政肅風清博雅崇文垂情藝苑布憲之暇訪及此書謂郡守嚴公

曰是誠郡史可以傳矣嚴公敬諾屬貳守邱公綜理之而民部秋軒薛公水部洪宇王公咸權稅於杭亦捐資焉未浹四旬勒梓已竟竊愧才綿識昧筆削無方符號訖癡虛上官之雅意楮宜覆瓿貽大方之哂言若肯直其闕略弭其訛謬哀為別集被我寵光是大願也

請疏西湖議

明陳善

西湖形勢利病何納言田學使論之詳矣予惟西湖實為郡城元氣所鍾設湖水淤塞若人之元氣痞閼未有

能生者矧上塘數千頃之田恃以為命可無慮乎吳越  
時湖葑蔓合歲置撩卒千人誠知所利者大雖歲役千  
夫而不靳也今縱不能置撩卒以任疏濬獨奈何任淘  
沙之卒分攄湖濱日負數十石之土而填之乎頃見沿  
城諸隄學士橋以東至西二十一丈南北二十七丈回  
墳東西三十九丈南北七十二丈柳洲亭東西二十  
八丈南北十丈黑亭子灣東西二十二丈南北百餘丈  
受沙磧者俱為平陸隄增數百丈即湖水減數百丈矣

及今不禁則湖水日隘過數十年將遂無西湖矣淘沙  
軍人皆自清波湧金錢塘三門而出若懸禁國門嚴責  
主守吏卒拒遏此輩無或闌入以為湖溷敢或相容比  
者連坐庶人知畏法而其源可絕矣又汀蓮岸芷半為  
豪右之家占以規利葑草蔓塞實此之由嘉靖十八年  
巡按傅公一嘗禁之未幾復縱四十四年南海龐公來  
巡復申厲禁而法久禁弛株蔓如故為今之計謂宜申  
明前事禁治占塞至於三橋四橋五橋外內湖水勢漸



涸葑草彌望不可以舟亟宜疏濬以儲蓄者今度其施  
功之序而題請於朝有事修濬使湖身深廣蓄水汪洋  
上塘曠旱無恐此杭民百世之利也若乃淘沙之患既  
行禁止仍以邏察之事責之湖傍里甲每獲必嚴加法  
懲示警則湖流不涸灌溉有賴郡城氣脉亦不至於耗  
竭矣

武林山辨

明  
邵重生

武林杭之名山因以名郡而古今皆朦朧未有直指的

名為某山者舊志以武林門右土埠俗稱祖山者當之  
為其山先名武林以避唐諱改稱虎林成化志引楊正  
質虎林山記謂錢王時祖山在郭外有異虎其山自名  
虎非避諱也及引宋樓攻媿詩武林山出武林水靈隱  
後山無乃是且宋淳熙志言漢書明載武林山為武林  
水所出安有又避唐諱之說決非城內無水小山明矣  
是夏公斷以靈隱後山北高峯為武林山矣與薛公通  
志同惜偏而未全一統志列武林山當矣下曰一名靈

隱一名靈苑一名仙居乃以靈隱山飛來峯二山為武林山是矣特認而未的至沙門契嵩武林山志與泗水潛夫武林舊事直以飛來峯為武林山似矣又局而未廣近田公西湖遊覽志陳公萬歷志皆不列武林山而以靈隱山下注一名武林山豈惟齟齬不明而名言更不正今予為辨者三以俟質之君子凡都邑之著稱者必以郡中佳山水祖山蟻蛭不足以當固矣特靈隱之名發於東晉其先秦兩漢厥名伊何愚意凡謂之山者

以其全體而言也高聳者曰山峯如脊者曰山嶺至岡陵邱阜皆有分別而一山字足以概之故武林山之名乃靈隱天竺諸山之祖名也自慧理既來以後有飛來之名焉有靈鷲之名焉有靈隱之名焉有天竺而後有三竺之名焉五印度而後有中竺之名焉至於蓮華佛國白雲白猿獅子香爐皆繼慧理發之而為武林之支名至於南高北高五雲雙檜乳竇月桂諸名又後人之濫觴也其曰形勝烏石靈苑仙居龍門楊梅西源善住

興正瑞雲慶化集慶秦亭又土人之私諡也自有諸名而武林反以無專主而晦如子姓衆多而又著則祖父之名遠而晦久而亡此常道也如羅浮有七十二峯皆謂之羅浮山黃山有三十六峯皆謂之黃山武夷有六十三峯皆謂之武夷山是可辨者一也羅處約靈隱碑曰浙水之右有山曰武林廬襄西征記杭地北環天隱國朝楊太守開西湖疏曰杭州南跨吳山北兜武林觀前人之文曰右曰環曰兜三字則非一二山之指其可

辨者二也且求武林山者必當求武林水杭南北二山之水孰有大於三竺靈隱之溪乎南則從捫壁嶺水出嶺合雙桂永清月桂諸塢北從石人西源合白沙韜光諸塢正與舊志合曰武林山有二水南出者曰南澗北來者曰北澗若惟以靈隱山為武林山則惟有北澗而無南澗若以飛來峯為武林山則飛來峯無水不出澗若以靈隱飛來二峯為武林山則南澗從天竺諸峯來發源不全況舊志云西湖匯武林山水秦時名武林水

至漢方有金牛明聖之號南北二山凡有水流入湖者皆武林山其可辨者三也質高人之偉見稽形勝之現存吾於武林也奚疑

清湖八議

明 沈匡濟

西湖為一郡靈氣攸鍾人文之秀發土田之沃饒靡不陰賴於斯取潤金水尅制火龍尤非謬妄邇者祝融肆虐所在為墟將來灌溉無資千頃失望實為杭民剝膚之患寧止蘓公之五不可廢哉故湖之宜清不宜占宜

濬不宜塞與清濬之宜速不宜遲不待智者而後知也  
惟是議論欲一規畫欲定時日欲寬錢鏹欲裕弗勤始  
怠終弗此傳彼咻弗朝令夕改兼此數者始克有濟謹  
將一得之愚列款上請仰候採擇一請親勘湖額雖占  
冊籍不磨按志按冊古額如鏡奈兼并者視清查為故  
套或播為流言以灰其心或結連豪右以掣其肘必請  
道府親臨踴勘十日前行出示檄縣同水利官喚集  
里排照冊逐一細看悉依古界標豎明白繪圖貼說申



送道府候按臨親勘庶遠近之人咸知事在必行負固之膽稍攝一收佃帖瀕湖占踞動以官帖藉口然帖有真有偽有遠年者有近日者有無帖而詭稱有帖者出示將原給官帖盡行送驗無帖即係白占有帖者亦須以今次換給為准舊帖不許沈匿一覈實數無帖與有帖而礙方隅者固均在墾濬之數矣其有帖而方隅不礙可通融議留者亦須查原帖內原佃丈尺止許照原數承管官為釘界責令石砌以防日後延占其佃一帖

十尤屬通弊盡行釐剔庶清出必多矣一酌祠墓先賢祠墓固不待言其指稱祠墓任意拓占者止查原勘畝段丈尺為界餘占者盡行拆去其民間墳墓不論久近儘其四至存留餘悉裁去一審挑運濬湖必分段築壩以次開深即以此運泥挑運僅可於數十步之內即須弛擔假使竭湖水而後挑則全湖皆乾矣若專責肩擔恐一簣之土挑運數里之外則用力多而成功少不若籌船運之法為便一陳庸見錢糧動經萬計措處必難

事情一經奏請耽延必久以職膚見止須院道詳允以  
二千金為費便可收二萬金之功蓋湖中葑草污泥非  
畚插可施莫若造小船六十隻每隻連篙櫓價銀三兩  
合計一百八十兩每船用夫二名每名日給工銀四分  
計一百日每船工銀八兩合計四百八十兩每人給長  
柄鐵鈚一把方廣一尺五寸該價二錢共計十二兩又  
人各授木掀一把該價二分共二兩四錢通共六百七  
十四兩四錢每兩人合操一船各持鐵鈚撈取葑草入

船滿則掙至空闊岸邊用長柄木掀拋堆岸上每日可  
扒六船百日可扒三萬六千船計此湖用如此工力疏  
通可徧矣尚餘一千三百二十餘兩即以為沿邊開掘  
硬土之費蓋硬土一方較濬污泥不啻十倍每工亦議  
給工銀四分計千二百金可募三萬工尚有一百二十  
金可募船夫運泥通計以三萬船疏淤塞三萬工掘漲  
阜事不思過半哉一運積土湖中撈起葑泥并開掘乾  
泥先日酌量某隄尚可高闊某處尚應填築即令載至

某處所堆積其不必高闊填築者不許妄加一簣一考  
工程木桿一根於湖心亭邊豎起將齊岸高處用朱漆  
記號未濬時從朱漆下量至水底某處某官管下若干  
深某處某官管下若干淺逐一登記自開濬起十日一  
量便知用工虛實勤惰虛惰者懲仍罰撈運勤實者獎  
賞容本職親自稽核

重修放鶴亭記

明  
李日華

昔人次第隱逸以聲光泯絕邈不可追如披裘石戶推

居太上余曰此程品之論也亦憎夫借逕終南佐命句  
曲者耳夫隱品當程而隱材尤當覈璞惟引虹是以貴  
其不雕劍惟犯斗是以惜其終掩彼碌碌錚錚者譬如  
猿蹲樹杪飲巖阿頑然有生一無表見則真深山野  
人何從覓幾希之異而命之隱君哉宋和靖先生嶽寄  
磊落之士也應制科不第退隱錢塘明聖湖初亦婚娶  
生子洪著有山家清供一編每稱先人非不妻而妻梅  
不予而子鶴也祥符天聖間二虜日驕韓范之略未能

綏靖忠佞糅雜丁夏之黨互為水火先生呻吟漆室紆  
軫於懷故發其遺書有曾無封禪之句所賫之志槩可  
見矣當日有繪湖景裝軸鬻錢湖上於林麓端標數字  
云林君復放鶴處先生見之曰世亦知有老逋耶後人  
想像其處作亭非先生自亭也先生一日倚杖柴門得  
句云夕寒山翠重秋淨雁行高吟諷滿意抵掌曰平生  
讀武侯傳未嘗不心折其鴻樹然視余今日麈尾於翠  
綠中覺神韻孤上翻似過之過之者軼之也亦驚之也

先生未嘗忘世世亦不能忘先生想見點雪冲虛絳鉞  
不設八瀛照影指縱由心飄蕭塵壒之表先生與鶴其  
俱在耶閩崔君仲徵次謬耿亮風采毅如生平官轍所  
經惠澤煦若春霖丰稜凜於霜鏐一觸璫焰幾燎崑墟  
幸霈新恩大節昭布來佐醴司責我邦國迴翔湖山之  
上狎主騷壇之盟其品與材與和靖先生而兩雖其顯  
晦夷沮判乎各遭然皆金玉其音而糠粃萬有者也崇  
禎壬申嘉平月友人陳則梁以書來云崔使君割廉標



勝孜孜未替前月一新湖心亭藍山人田叔監之韓太  
史求仲記之今又新放鶴亭徐文學仲友監之吾子當  
記之余謝不敏既而曰是誠在我余既慕崔使君之品  
與材每坐馳明聖湖頭即胷中著兩和靖而生平詮次  
隱逸所耿耿欲吐如是敢附見之

西湖志纂卷十一

欽定四庫全書

西湖志纂卷十二

大學士梁詩正等輯

藝文 詩 詞

五言古

早春錢塘湖晚眺

唐張祐

落日下林坂  
撫襟睇前蹤  
輕澌流迴浦  
殘雪明高峯  
仰視天宇曠  
俯登雲樹重  
聊當問真界  
昨夜西巒鍾

懷西湖寄晁美叔同年

宋 蘇軾

西湖天下景遊者無愚賢深淺隨所得誰能識其全嗟  
我本狂直早為世所捐獨專山水樂付與寧非天三百  
六十寺幽尋遂窮年所至得其妙心知口難傳至今清  
夜夢耳目餘芳鮮君持使者節風采爍雲煙清流與碧  
巘安肯為君妍胡不屏騎從暫借僧榻眠讀我壁間詩  
清涼洗煩煎策杖無道路直造意所便應逢古漁父葦  
間自黃綠問道若有得買魚勿論錢

遊杭州山

蘇軾

山中村塢迷野寺鐘相答晚陰失林莽落日猶在塔行  
招兩社僧共步青山月送客渡石橋迎客出林樾幽尋  
本真性往事聽徐說錢王方壯年此邦事輕俠鄉人鄙  
貧賤異類識英傑立石像興王遺址今岌案功勲三吳  
定富貴四海甲歸來父老藏崇高畏傾壓詩人工譏病  
此欲恣挑抉流傳後世人談笑資口舌是非今已矣興  
廢何倉卒持歸問禪翁笑指浮漚沒

五月十日與呂仲甫周邠僧惠勤惠思清順可

久惟肅義詮同泛湖遊北山 蘇軾

三吳雨連月湖水日夜添尋僧去無路潏潏水拍簷駕  
言徂北山得與幽人兼清風洗昏翳晚景分濃纖縹緲  
朱樓人斜陽半踈簾臨風一揮手悵焉起遐瞻世人驚  
朝市獨向溪山廉此樂得有命輕薄神所殲

湖上即事

元黃潛

垂雲晝濛濛湖面惟一色薄暮風更生際夜雪初積陰

凝勢方盛塵境喧暫息坐久聞拏音忽然破寥寂

曉行湖上

黃潛

曉行錢塘湖旭日青林半霧露寒未除鳬鷺靜初散延  
緣際餘景閃條多遺玩會心乍有無撫已成獨歎夙子  
丹霞約久茲芳草畔獨往願易違離居歲方換沙暄紫  
芽動春遠川華亂前期乃寂寞取適豈爛漫小隱倘見  
招漁樵共昏旦

遊西湖

明徐霖

西湖如明鏡諸山如美人美人照明鏡形影兩能真歌  
聲何處來山鳥解鳴春飛花舞當筵布作錦繡茵可惜  
無畫手能為景傳神所賴有詩酒陶寫風物新一賞詎  
云足安得日相親

西湖

明  
袁宏道

龍井饒甘泉飛來富石骨蘇隄十里風勝果一天月錢  
祠無佳處一片好石碣孤山舊亭子涼蔭滿林樾一年  
一桃花一見一白髮南高看雲生北高看日沒楚人無



羽毛能幾到吳越

扈從渡錢塘江經雲栖虎跑飛來峯

國朝

張英

東風動漣漪鼓枻渡錢塘沿綠歷沙渚山徑多微茫林  
巒轉幽邃十里青篴簫映水綠娟娟憂玉聲琅琅紫蘭  
被山谷日暖吹微香西度虎跑側北逾鷺嶺傍奇峯削  
雲根凌空欲飛翔澄溪迴數折灌木羅千章鍾聲度白  
雲閣影摩青蒼  
萬乘一回顧巖壑生清光

扈 蹕西湖紀事

國朝 宋 肇

平生慕西湖聞說便神旺吳越咫尺耳七載勞悵望何  
意奉宸遊夙懷得一暢朝出湧金門耳目忽清曠

水潑蒲萄醅山矗翡翠障白蘇勾留處西子譬允當追  
隨豹尾間未敢策筇杖聖情厘民依物外聊探

訪御墨灑湖亭句陳入雲嶂詔許侍從臣小

憩就畫舫亭午獨徘徊迢遞聞漁唱六橋宛沿綠兩峯  
屹相向指點從山僧脫帽迴隄上瞻拜武穆墳酌酒發

感愴還過冷泉亭兀坐茶煙颺奇峯真飛來驚駭莫能  
狀勝地難久停歸趁湖波漲道人索題詩留待後來償  
殘陽卦斷塔古色落艤榜薄暮趨行宮劍佩依仙仗

七言古

錢塘曲

唐  
溫庭筠

錢塘岸上春如織森森寒潮帶秋色淮南遊客馬連嘶  
碧草迷人歸不得風飄客意如吹煙纖指殷勤傷雁絃  
一曲堂堂紅燭筵長鯨瀉酒如飛泉

次韻曹子方運判雪中同遊西湖

宋  
蘇軾

詞源艷艷波頭展清唱一聲巖谷滿未容雪積句先高  
豈獨湖閑心自遠雲山已作歌眉淺山下碧流清似眼  
尊前侑酒只新詩何異書魚餐蠹簡

臘日游孤山訪惠勤惠思二僧  
蘇軾

天欲雪雲滿湖樓臺明滅山有無水清石出魚可數林  
深無人鳥相呼臘日不歸對妻孥名尋道人實自娛道

人之居在何許寶雲山前路盤紆孤山孤絕誰肯廬道  
人有道山不孤紙窗竹屋深自暖擁褐坐睡依團蒲天  
寒路遠愁僕夫整駕催歸及未晡出山迴望雲木合但  
見野鶻盤浮圖茲遊淡薄歡有餘到家恍如夢遽遽作  
詩火急追亡逋清景一失難追摹

遊靈隱寺得來詩復用前韻  
蘇軾

君不見錢塘湖錢王壯觀今已無屋堆黃金斗量珠運  
盡不勞折簡呼四方宦遊散其孥宮闕留與閒人娛盛

金  
卷十二  
衰哀樂兩須臾何用多憂心鬱紆溪山處處皆可廬最  
愛靈隱飛來孤高松百丈蒼髯鬚擾擾下笑柳與蒲高  
堂會食羅千夫撞鐘擊鼓喧朝晡凝香方丈眠氍毹絕  
勝絮被縫海圖清風徐來驚睡餘遂超羲皇傲几蘧歸  
時棲鴉正畢逋孤煙落日不可摹

和蔡準郎中見邀遊西湖三首 蘇軾

夏潦漲湖深更幽西湖落木芙蓉秋飛雪閣天雲拂地  
新蒲出水柳映洲湖上四時看不足惟有人生飄若浮

解顏一笑豈易得主人有酒君應留君不見錢塘游宦  
客朝推囚暮決獄不因人喚何時休

城市不識江湖幽如與螭蛄語春秋試令江湖處城市  
却似麋鹿遊汀洲高人無心無不可得坎且止乘流浮  
公卿故舊留不得遇所得意終年留君不見拋官彭澤  
令琴無絃中有酒醉欲眠時遣客休

田間決水唱幽幽插秧未遍麥已秋相攜燒筍苦竹寺  
却下踏藕荷花洲船頭斫鮮細縷縷船尾炊玉香浮浮

臨風飽食得甘寢肯使細故胸中留君不見壯士憔悴  
時飢謀食渴謀飲功名有時無罷休

登介亭餞楊傑次公

蘇軾

籃輿西出登山門嘉與我友尋仙村丹青明滅風篁嶺  
環珮空響桃花源前朝欲上已蠟屐黑雲白雨如傾盆  
今晨積霧卷千里豈畏觸熱生病根在家頭陀無為子  
久與青山為弟昆孤峯盡處亦何有西湖鏡天江抹坤  
臨高揮手謝好住清風萬壑傳其言風回響答君聽取



我亦到處隨君軒

聞林夫當徙靈隱寺寓居戲作靈隱前一首

蘇軾

靈隱前天竺後兩澗春淙一靈鷲不知水從何處來跳  
波赴壑如奔雷無情有意兩莫測肯向冷泉亭下相縈  
回我在錢塘六百日山中暫來不暖席今君欲作靈隱  
居葛衣草履隨僧蔬能與冷泉作主一百日不用二十  
四考書中書

西湖春遊

宋 陸 游

靈隱前天竺後鬼削神剡作巖岫冷泉亭中一樽酒一  
日可敵千年壽清明後上巳前千紅百紫爭妖妍蓼蓼  
鼓聲蹋場邊鞦韆一蹴如登仙人生得意須年少白髮  
龍鍾空自笑君不見灞亭耐事故將軍醉尉怒訶如不  
聞

臘日與守約同舍賞梅西湖

宋 王十朋

西湖處士安在哉湖山依舊梅花開見花如見處士面

神清骨冷無纖埃不將時節較早晚風味自是花中魁  
暗香和月入佳句壓盡今古無詩才武林深處境益勝  
十里眼界多瓊瑰北枝貪睡南枝醒杖履得得攬出來  
旅中茲遊殊不惡況有佳友銜清杯手折林間一枝雪  
頭上戴得新春回

靈芝寺臨西湖倪正父尚書曰此湖如賢者別  
久再見儼然如昨感其言而作

宋樓 鑰

舊說西湖比西子君言西湖似賢士吁嗟契闊十五年  
一旦相逢祇如此南山北山兩高峯春波艷艷磨青銅  
未能蕩漿窮勝處倚闌一望開心胸老我挂冠歸田里  
豈知再見煙連水小須夏日醉蒲荷脫屣東歸甘已矣

次韻湖亭秋望

元周權

紅衣老盡玻璃國孤嶼寒煙落秋色豆花過雨水風涼  
落日殘蟬踈樹碧雁天紺滑秋雲淨光涵炯炯開寒鏡  
蟾枝香冷酒微醒長笛一聲無盡興

雪蓬小朶歌送奎方舟還靈鷲

明貝瓊

蓬婆雪嶺高崔嵬橫絕青天飛鳥回山中小朶更奇峭  
石作蓮花千葉開巨靈擘山斷山脈一峯夜向東南擲  
千秋乾竺空有名萬里峨眉盡無色攢青疊翠分西湖  
洞口白猿猶可呼咸和之年有慧理卓錫尚愛飛來孤  
木杯高僧兩眉雪身如濯水清蓮潔繙經石上不知年  
桂子年年落秋月

泛高士湖

有序

明  
孫一元

正德乙亥孟春予與石川子泛舟西湖時石川子著  
方山冠予戴華陽巾被高士服把酒四望顧謂石川  
子曰昔青蓮居士李白與尚書郎張謂泛沔州南湖  
因稱為郎官湖今予與子遊頗追蹟前事西湖固可  
改為高士湖矣石川子大笑酌酒於湖命予作詩紀  
之時予已爛醉即信口長短成篇不竄易一字

我聞唐家李白一世賢郎官之湖至今傳我今與子繼  
其跡勝事豈容昔人專方冠野服興不減駕船載酒凌

蒼煙千山萬山兩岸爭蜿蜒羣龍如在几席前青天落  
杯底白日行酒邊鼉鼉突兀波面出大魚小魚分避船  
君拍銅斗我歌扣舷天風下來雲葉翩翩爛醉騎鯨遊  
崑崙巔

西湖歌送友

國朝 汪琬

君不見西湖流水碧於玉沙草如煙繞湖綠西冷橋邊  
花正開落花瓣片隨風來木蘭艇子蜻蜓尾棹入荷花  
三十里壚頭少婦調銀箏嬌歌一曲最有情當窓卷却

青綃幕花香水氣傳歌聲行人日午相倚聽勸盡絲繩  
雙玉餅仙郎家近西湖住暫乞

君恩賦歸去燕臺日暮風淒淒道傍相逢惜解攜羨君  
南行向湖隄向湖堤策馬蹄湖水平湖草齊

湖上觀荷

臣沈德潛

十里紅雲幾曾斷楚客衣裳影凌亂輕舸如葉傍蘇隄  
領略清香剛一半水風踈踈波瀟瀟轉入裏湖香不了  
風標公子隨人行爾我忘機莫驚擾紅粧蘭槳畫橋西



同伴歌聲一道齊  
蕩向綠楊深處去  
令人想像若耶溪  
五言律

舟次武林寄天竺僧無畫

唐許渾

谿長山幾重  
十里萬株松  
秋日下丹檻  
暮雲歸碧峯  
樹棲新放鶴  
潭隱舊降龍  
還在孤舟宿  
卧聞初夜鐘

郡中西園

唐姚合

西園春欲盡  
芳草徑難分  
靜語惟幽鳥  
閒眠獨使君  
密林生雨氣  
古石帶潮紋  
雖去清秋遠  
朝朝見白雲

夏日登靈隱寺後峯

唐方干

絕頂無煩暑登臨三伏中  
深蘿難透日喬木更含風  
山疊雲霞際川傾世界東  
那知茲夕興不與古人同

上湖間泛艤舟石函因過下湖小墅

宋林逋

平臯望不極雲樹遠依依  
及向扁舟泊還尋下瀨歸  
青山連石埭春水入柴扉  
多謝提壺鳥留人到落暉

北山寫望

林逋

晚來山北景圖畫亦應非  
村路飄黃葉人家濕翠微  
樵當雲外見僧向水邊歸  
一曲誰橫笛兼葭白鳥飛

湖山小隱

林逋

猿鳥分清絕林蘿擁翠微  
步穿僧徑出肩搭道衣歸水  
墅香醑熟煙崖早筍肥  
功名無一點何處更忘機  
園井夾蕭森紅芳墮翠陰  
晝巖松鼠靜春塹竹雞深  
歲課非無术家藏獨有琴  
顏原遺事在千古壯閒心

寄西湖林處士

宋  
范仲淹

蕭索遶寒雲清歌獨隱淪巢由不願仕堯舜豈遺人一  
水無涯靜羣峰滿眼春何當伴閒逸嘗酒過比鄰

西湖泛舟

宋  
梅堯臣

冰消湖已淥渺渺鴨頭春草學吳兒刺吟希楚老薪對  
山憐去鳥隔樹識遊人誰念滄江上風柔採白蘋

西湖間望

梅堯臣

夏景已多趣湖邊日更嘉園葵雜紅紫岸柳自歌斜雨  
氣收林表城陰接水涯愛閒輸白鳥盡日立汀沙

蓮花峯

元貝瓊

浮雲交靈竇孤石竦岩堯地識金仙隱巖看玉女朝香  
爐分秀色太華並高標恐有裁眉雪千秋尚未消

連巖棧

貝瓊

危棧梯空上人行杳靄中險應逾鳥道幽已出龍宮日  
月三天近風雲一徑通何當倚飛翠極目送高鴻

湖邊春思

元馬臻

西林花雨霽春氣欲飛浮船過吹簫客旗標賣酒樓暖

煙鶯自在遲日蝶風流正是桑麻處支筇念舊遊

西湖晚思

馬臻

日落湖水黑衆山生遠塵船回載酒客樓倚獨吟人老  
態多思舊時情只貴新籬邊古梅樹開謝幾年春

西湖

明  
聶大年

西出江城外煙霞隔世塵鐘聲三竺曉花氣六橋春雞  
犬桃源地笙歌閬苑人平時得遊賞忘却宦中身

泛西湖同清照彥叔觀公

明  
吳鼎芳

新語報黃鸝  
捎花坐柳枝  
山晴意自好  
湖晚醉相宜  
風起水香處  
月來煙滅時  
同舟貪夜寂  
移傍白公隄

過南屏訪生上人

國朝

吳偉業

謂此一公住  
偶來聞午鐘  
山容參雪嶠  
佛火隱雷峰  
路細因留竹  
雲深好護松  
精廬人不到  
相對話南宗

上巳後三日泛舟西湖分韻得交字

國朝

朱彝尊

獨棹花陰入  
重湖柳色交  
斷橋亭蓋瓦  
曲院水通坳  
楚

雀簷猶澀江蓮葉尚包

宸遊留翠墨車馬溢春郊

湖上

國朝  
宋 琬

山色南屏好空濛乍有無曲塘迴舴艋高柳臥鷓鴣雲  
起千峯合天晴一塔孤段家橋畔過邨酒正堪沽

石筍峯

國朝  
龔翔麟

石筍槎牙勢分明走籜龍欲排霄漢上時有白雲封卓  
筆誰相擬采芝人未逢再來猿已熟拄杖得從容

韜光菴

國朝  
王式丹



叢篁高蔽日，曲澗細鳴泉。  
乍可尋幽徑，真成到洞天。  
佛燈明蘚壁，僧磬冷炊煙。  
嘆息香山去，無人愛種蓮。

冷泉亭

臣 沈德潛

奇峯回合處，一水鑑空明。  
不記何年冷，能令萬古清。  
涵空天倒映，穿石澗常鳴。  
靜向亭隅坐，冷然滌性情。

五言排律

和運使舍人觀潮

宋 范仲淹

何處潮偏盛，錢塘無與儔。  
誰能問天意，獨此見濤頭。  
海

浦吞來盡江城打欲浮勢雄驅島嶼聲怒戰貔貅萬疊  
雲纔起千尋練不收長風方破浪一氣自橫秋高岸驚  
先裂羣源怯倒流騰凌大鯤化浩蕩六鼇遊北客觀猶  
懼吳兒弄勿憂子胥忠義者無覆巨川舟

林處士水亭

宋 陳堯佐

城外逋翁宅開亭野水寒冷光浮荇葉靜影浸漁竿吠  
犬時迎客飢禽忽上闌踈籬僧舍近嘉樹鶴庭寬拂砌  
煙絲裊侵窻筍戟攢小橋橫落日幽徑轉層巒好景吟

何盡清歡畫亦難  
憐君留我意重疊取琴彈

遊靈隱寺

國朝 嚴繩孫

舊聞靈隱寺此日足幽尋  
自昔傳飛錫于今尚布金  
江流消劫火山饗答潮音  
桂子丹崖古蓮華碧殿深  
到來惟瀑水近處即長林  
夜誦聞猿語朝參是虎心  
未能捐慧業已是異塵襟  
落日荒荒去春煙細細沈  
祇應掃花雨息影驚峯陰

七言律

餘杭形勝

唐白居易

餘杭形勝四方無  
州傍青山縣枕湖  
遶郭荷花三十里  
拂城松樹一千株  
夢兒亭古傳名謝  
教妓樓新道姓蘇  
獨有使君年太老  
風光不稱白髭鬚

杭州春望

白居易

望海樓明照曙霞  
護江隄白踏晴沙  
濤聲夜入伍員廟  
柳色春藏蘇小家  
紅袖織綾誇柿蒂  
青旗沽酒趁梨花  
誰開湖寺西南路  
草綠裙腰一道斜

夜歸

白居易

半醉閒行湖岸東，馬鞭敲鐙轡璫璫。  
萬株松樹青山上，十里沙隄明月中。  
樓角漸移當路影，潮頭欲過半江風。  
歸來未放笙歌散，畫戟門開蠟炬紅。

錢塘湖春行

白居易

孤山寺北賈亭西，水面初平雲腳低。  
幾處早鶯爭暖樹，誰家新燕啄春泥。  
亂花漸欲迷人眼，淺草纔能沒馬蹄。  
最愛湖東行不足，綠楊陰裏白沙隄。

春題湖上

白居易

湖上春來似畫圖  
亂峯圍繞水平鋪  
松排山面千重翠  
月點波心一顆珠  
碧毯線頭抽早稻  
青羅裙帶展新蒲  
未能拋得杭州去  
一半勾留是此湖

西湖留別

白居易

征途行色慘風煙  
祖帳離聲咽管絃  
翠黛不須留五馬  
皇恩只許住三年  
綠藤陰下鋪歌席  
紅藕花中泊妓船  
處處回頭盡堪戀  
就中難別是湖邊

答客問杭州

白居易

為我踟躕停酒盞與君約略說杭州  
山名天竺堆青黛湖號錢塘瀉綠油  
大屋簷多裝雁齒小航船亦畫龍頭  
所嗟水路無三百官繫何因得再遊

叙錢塘異勝

唐方干

暖景融融寒景清越臺風送曉鍾聲  
四郊遠火燒煙月一棹驚波撼郡城  
夜雪未知東岸綠春風猶放半江晴  
謝公吟處依稀在千古無人繼盛名

秋日湖西晚歸舟中書事

宋 林逋

水痕秋落蟹螯肥，閒過黃公酒舍歸。  
魚覺船行沉草岸，犬聞人語出柴扉。  
蒼山半帶寒雲重，丹葉疎分夕照微。  
却憶青溪謝太傅，當時未解惜蓑衣。

西湖

林逋

混元神巧本無形，匠出西湖作畫屏。  
春水淨於僧眼碧，晚山濃似佛頭青。  
藥爐粉堵搖魚影，蘭杜煙叢閣鷺翎。  
往往鳴榔與橫笛，細風斜雨不堪聽。



自題小隱

林逋

湖水入籬山遶舍  
隱居應與世相違  
閉門自掩蒼苔跡  
過客時驚白鳥飛  
賣藥比常嫌有價  
灌園終亦愛無機  
如何天竺林間路  
猶到秋深夢翠微

西湖

宋 蔡襄

湖上山光一抹青  
佛宮高下裏巖扃  
煙收水曲開塵匣  
春送人家入畫屏  
竹氣更清初霽雨  
梅英猶細欲殘星  
吳船越棹知何處  
柳拂長隄月滿汀

和浙江觀潮

蔡襄

地卷天回出海東，人間何事可爭雄。  
千年浪說鴟夷怒，一信全疑渤海空。  
寂靜最宜聞夜枕，崢嶸須待駕秋風。  
尋思物理真難測，隨月虧圓亦未通。

次韻劉景文寒食同遊西湖

宋蘇軾

絮飛春減不成年，老境同乘下瀨船。  
藍尾忽驚新火後，遨頭要及浣花前。  
山西老將詩無敵，洛下書生語更妍。  
共向北山尋二士，畫桡鼉鼓聒清眠。

有以官法酒見餉者因用前韻求述古為移厨

飲湖上

蘇軾

喜逢門外白衣人欲膾湖中赤玉鱗  
遊舫已裝吳榜穩舞衫初試越羅新  
好將魚釣追黃帽未要靴刀抹絳巾  
芳意十分強半在為君先踏水邊春

寒食未明至湖上太守未來兩縣令先在

蘇軾

城頭月落尚啼烏烏榜紅舷早滿湖  
鼓吹未容迎五馬

水雲先已颺雙鳬映山黃帽螭頭舫夾道青煙鵲尾爐  
老病逢春只思睡獨求僧榻寄須臾

宿水陸寺寄北山清順僧二首 蘇軾

草沒河隄雨暗邨寺藏修竹不知門拾薪煮藥憐僧病  
掃地焚香淨客魂農事未收侵小雪佛燈初上報黃昏  
年來漸識幽居味思與高人對榻論

長嫌鍾鼓聒湖山此境蕭條却自然乞食遶邨真為飽  
無言對客本非禪披榛覓路衝泥入洗足闔門聽雨眠

遙想後身窮賈島夜寒應聳作詩肩

和子瞻沿牒京口憶西湖寒食出遊見寄

宋  
陳襄

春陰漠漠燕飛飛可惜春光與子違  
半嶺煙霞紅旆入滿湖風月畫船歸  
縵笙一闋人何在遼鶴重來事已非  
猶憶去年題別處烏啼花落客沾衣

湖上戲題

宋  
周紫芝

一湖春水綠漪漪卧水桃花紅滿枝  
去住雲情渾不定

陰晴天色故相欺  
風前柳作小垂手  
雨後山成雙畫眉  
何必娉娉仍嫋嫋  
西湖應便是西施

與兒輩泛舟遊西湖一日間陰晴屢易

宋  
陸游

逢著園林即款扉  
酌泉煮筍欲忘歸  
楊花正與人爭路  
鳩語還催雨點衣  
古寺題名那復在  
後生識面自應稀  
驚心六十餘年事  
雙塔依然在翠微

沈虞卿秘監招遊西湖

宋  
楊萬里

蘇公隄遠柳生煙和靖園深竹映闕船入芰荷香處去  
人從雲水國中還似寒如煖清和在欲雨翻晴頃刻間  
能為蓬萊老仙伯一杯痛飲吸湖山

領客泛湖

宋 魏了翁

鳴鞘踏月大隄長鼓枻穿雲落日黃十里青漪菱草蕩  
四山紅雨杏花岡客從民氣覩春事人在枝頭看艷陽  
長使舟平風色好世間何處有羊腸

西湖泛舟

宋 葛天民

晴嵐漠漠水溶溶落葉遮船翠蓋重秋色盡為漁父占  
山光多向道人濃雲連合抱前邨樹澗遠飛來小朶峯  
送罷夕陽迎素月樓臺高下自鳴鐘

題李公略示高郎中吳山觀月圖

元  
仇  
遠

憑高宜晚更宜秋下馬歸來即倚樓納納乾坤雙老眼  
滔滔江漢一扁舟滿城明月空吳苑隔岸青山認越州  
李白酒豪高適筆當時人物總風流



浙江潮

仇遠

一痕初見海門生，頃刻長驅作怒聲。  
萬馬突圍天鼓碎，六鰲翻背雪山傾。  
遠朝魏闕心猶壯，直上嚴灘勢始平。  
寄語吳兒休踏浪，天吳象罔正縱橫。

題沈君湖山春曉圖詩卷

元楊載

迤邐沙隄接畫橋，東風楊柳暗長條。  
鶯隨玉笛聲偏巧，馬受金羈氣益驕。  
舞榭歌臺臨道路，佛仙宮館入雲霄。  
西湖春色年年好，底事詩翁嘆寂寥。

錢塘江潮

元 陳基

千古東南訖海潮，摩挲強弩未全消。  
氣乘日月分盈縮，聲振山河欲動搖。  
擊楫中流歌慷慨，倚闌斜日鬢飄蕭。  
錢塘官酒秋仍綠，更與靈胥酹一瓢。

次韻曹參政觀潮

元 柳貫

風陣先驅入座間，雪濤千疊湧如山。  
太陰成魄清秋正，元氣流形大信還。  
絳額青綃方戰罷，素車白馬自神閒。  
歸墟咫尺蓬萊島，斜日將西認髻鬟。

浙江觀潮

元  
黃潛

潮生潮落有時休  
朝暮吳兒幾白頭  
披髮祗誇迎駭浪  
側身寧解障奔流  
江吹碧瓦人聲曉  
雲閃朱旗海氣秋  
後夜月明天在水  
有誰能此試登樓

西湖

元  
楊維禎

西湖風景開圖畫  
墨客騷人入咏嗟  
扇底魚龍吹日影  
鏡中鶯燕老年華  
蘇隄物換前朝柳  
葛嶺人耕故相家  
今古消沉一杯水  
兩峯長照夕陽斜

宿天開圖畫閣用楊廉夫韻

元 吳 納

承天觀裏開圖畫吳越山河一覽中  
半夜月明湖水白  
五更日出海門紅  
彩船春晚笙歌歇  
粉堞風高鼓角雄  
十二闌干都倚遍  
歸心飛過大江東

寄西湖林一貞先生

元 丁鶴年

錦繡湖山世絕稀  
東風不放賞心違  
芙蓉楊柳臨清淺  
佛剎仙宮遠翠微  
畫舫載春天上坐  
紫駟馱醉月中歸  
高情獨有林和靖  
門掩晴空看鶴飛

西湖二首

國朝 嵇宗孟

天目崢嶸萬仞青，龍飛鳳舞下西泠。  
六橋煙柳藏春塢，三竺雲山列畫屏。  
花滿僧樓人度曲，月明漁港夜揚舲。  
白蘇自是神仙吏，千古風流在此亭。

天洗鴻濛蕩素波，羣峯鵠立湧青螺。  
夕陽簫鼓煙霞寺，春雨牛羊瑪瑙坡。  
風雅最宜修禊酒，詩狂愛聽接羅歌。  
也知此水吾師友，一月須教十數過。

吳山望浙江

國朝 朱彝尊

一峯高出萬松寒磴道虛疑十八盤近海魚龍吹宿霧  
中天日月轉浮瀾風帆岸壓明珠舶仙樹花濃白石壇  
舊是錦衣行樂地江山真作霸圖看

韜光

國朝 湯右曾

澗橋徙倚老松根寂歷巖扉畫不喧坐覺清風生石壁  
行窮修竹見山門依依煙郭江光遠點點林鴉海氣昏  
却怪白沙春漲闊遊人指點說潮痕

功德崇坊

即表  
忠觀

國朝 厲鶚

吳越勲名迥莫齊

天書新降武都泥  
崢嶸重見龍

山觀鼎扇猶存玉局碑  
夾岸雲霞烘畫壁  
滿湖風雨捲靈旗  
艤舟小住垂楊下  
願采香蘋薦一卮

雲棲梵徑

臣沈德潛

長松萬壑蛟龍吟  
引我入山深  
復深老僧修行惟贊佛  
客子訪道還洗心  
巖前白雲有來去  
池裏青蓮無古今  
誰能此地結茅屋  
壁觀峯頂常幽尋

五言絕句

湖上

唐白居易

郭外迎人月湖邊醒酒風誰留使君飲紅燭在舟中

人日出游湖上

宋楊萬里

放閘冷泉亭抽動一天碧平地跳雪山晴空下霹靂

題何使君西湖泛舟卷

明陳獻章

潮勢傾滄海江聲下富春西湖剛十里偏耐醉遊人

題靈隱千佛閣

明徐渭

靈山高閣迥千佛一燈傳萬古西湖月年年照冷泉



表忠觀

本錢王故苑後捨宅作寺南渡後建祠寺傍新進士題名開宴於此

國朝

毛奇齡

落日移舟晚春明啓宴遲誰憐臨水宅猶是曲江池

王所

居名臨水里

六言絕句

次韻聞復西湖夏日

宋釋道潛

夜深一碧萬頃彷彿明河接天岸曲風篴成韻絕勝細

管繁絃

湖上

元張憲

紅杏牆頭粉蝶綠楊窓外黃鸝何處春光最好踏青人  
在蘇隄

西湖雜興

明王叔承

看花須近寒食看潮待過中秋二月十五花信八月十  
八潮頭

沽酒林逋宅畔折花蘇小墳邊蓮葉擢開明月竹枝歌  
斷蒼煙

顧孝廉嗣立載酒夜泛

國朝

朱彝尊

白鷺鷥拳一足綠楊柳散千條誰唱彎彎月子赤闌干  
第四橋

蘇學士隄芳草水仙王廟寒泉正好當頭月色莫因半  
醉迴船

七言絕句

宿天竺寺寄靈隱寺僧

唐

張籍

夜向靈溪息此身風泉竹露淨衣塵月明石上堪同宿

那作山南山北人

杭州回舫

唐

白居易

自別錢塘山水後不多飲酒懶吟詩  
惟將此意憑回棹報與西湖風月知

吳亭

宋

趙抃

吳山越水似圍屏妙墨無人畫得成  
間上東南亭上望直疑身世是蓬瀛

清暑堂

趙抃

江上潮音曉暮聞  
天饒風月地無塵  
自誇清暑堂中景  
容得衰翁未退身

經林逋舊居

宋 蔡 襄

修竹無多宅一區  
先生曾此隱西湖  
詩言不喜書封禪  
亦有餘書補世無

山色凝嵐水色清  
山雲常與水雲平  
先生來舉持竿手  
釣得人間亢俗名

飲湖上初晴後雨二首

宋 蘇 軾

朝曦迎客艷重岡晚雨留人入醉鄉此意自佳君不會  
一杯當屬水仙王

水光潋灩晴偏好山色空濛雨亦奇若把西湖比西子  
淡粧濃抹也相宜

望海樓

蘇軾

海上濤頭一線來樓前指顧雪成堆從今潮上君須上  
更看銀山二十回

橫風吹雨入樓斜壯觀應須好句誇雨過潮平江海碧

電光時掣紫金蛇

青山斷處塔層層  
隔岸人家喚欲應  
江上秋風晚來急  
為傳鐘鼓到西興

樓上誰家燒夜香  
玉笙哀怨弄初涼  
臨風有客吟秋扇  
拜月無人見晚粧

八月十五看潮五絕

蘇軾

定知玉兔十分圓  
已作霜風九月寒  
寄語重門休上鎖  
夜潮留向月中看

萬人鼓噪懾吳儂猶似浮江老阿童欲識潮頭高幾許  
越山渾在浪花中

江邊身世兩悠悠久與滄波共白頭造物亦知人易老  
故教江水向西流

吳兒生長狎濤淵冒利輕生不自憐東海若知明主意  
應教斥鹵變桑田

江神河伯兩醺雞海若東來氣吐霓安得夫差水犀手  
三千強弩射潮低



夜泛西湖

蘇軾

菰蒲無邊水茫茫  
荷花夜開風露香  
漸見燈明出遠寺  
更待月黑看湖光

湖光非鬼亦非仙  
風恬浪靜光滿川  
須臾兩兩入寺去  
就視不見空茫然

晚至西湖惠照寺石橋上

宋楊萬里

船於鏡面入煙叢  
寺在湖心更柳中  
暮色欲來吾欲去  
其如南北兩高峯

西湖晚歸

楊萬里

際晚遊人也合歸畫船猶自弄斜暉  
西湖兩岸千株柳絮不因風暖自飛

正元二日與菊莊湯伯起歸隱陳鵠甫泛舟湖  
上

宋武衍

春雲漠漠雨踈踈小艇衝煙入畫圖  
除却淡粧濃抹句更將何語比西湖

蘇隄春曉

宋王洧

孤山落月趁踈鐘  
畫舫參差柳岸風  
鶯夢初醒人未起  
金鴉飛上五雲東

柳浪聞鶯

王洧

如簧巧囀最高枝  
弱柳新縈萬縷絲  
翠鳳不來春已老  
聲聲訴與落花知

花港觀魚

王洧

斷溪惟餘舊姓傳  
倚欄投餌說當年  
沙鷗曾見園興廢  
近日遊人又玉泉

麴院荷風

王洧

避暑人歸自冷泉  
埤頭雲錦晚涼天  
愛渠香陣隨人遠  
行過高橋方買船

南屏晚鐘

王洧

澗水摩崖半綠苔  
春遊誰向此中来  
晚煙深處蒲牢響  
僧向城中應供回

雷峯夕照

王洧

塔影初收月影昏  
隔牆人語近甘園  
南山遊遍分歸路

半入錢湖半暗門

湖上暮歸

元 趙孟頫

春陰柳絮不能飛  
雨足蒲芽綠更肥  
正恐前呵驚白鷺  
獨騎款段遶湖歸

西湖竹枝

元 楊維禎

蘇小門前花滿株  
蘇公隄上女當壚  
南官北使須到此  
江南西湖天下無

湖口樓船湖日陰  
湖中斷橋湖水深  
樓船無舵似郎意

斷橋無柱是儂心

石新婦下水連空飛來峯頭山萬重不辭妾作望夫石

望郎或似飛來峯

望郎一朝又一朝信郎信似浙江潮浙江潮信有時失

臂上守宮無日消

臣謹按劉禹錫竹枝序云竹枝巴歛也音協黃鍾羽末如吳聲故吳人多效之維楨初為西湖竹枝一時和者百有餘家其自序云一洗樽俎粉黛之習道揚風諭古人之教廣矣意蓋主於變風故能不失唐人尺度自後作者彌衆而協律者鮮錄其尤雅者以備詩家之一體云

前題

元倪瓚

錢王墓田松栢稀岳王祠堂在湖西西泠橋邊春草綠  
飛來峯頭烏夜啼

前題

元吳復

官河遶湖湖遶城河水不如湖水清不用千金酬一笑  
郎恩才重妾身輕

西湖春日即事

元馬臻

畫船過午入西邨

西泠橋一名西邨橋

人擁孤山陌上塵曾被弁

陽摹寫盡晚來閒却半湖春

西湖歌

明  
張文宿

西湖佳麗屬錢塘一決沙河隔混茫  
流下石函高十丈  
恰如天上瀉銀潢

列區上應斗牛文水接仙源八派分  
閒倚鵲樓舒遠眺  
碧波寒浸兩峯雲

庚午冬遊韜光

明  
文震孟

斜陽竹樹影蕭蕭獨有幽蛩破寂寥  
萬境不波心似水



滿庭紅葉映山椒

西湖竹枝

明瞿祐

昨夜相逢第一橋  
自將羅帶繫郎腰  
願郎得似長江水  
日日如期兩度潮

前題

明黃周星

山川不改仗豪雄  
浩氣能排岳麓松  
岳少保同于少保  
南高峰對北高峰

西湖夜泛

國朝周起渭

天邊明月光難並人世西湖景不同若把西湖比明月  
湖心亭是廣寒宮

西湖雜詩

國朝

黃任

荷花十里桂三秋南渡衣冠足卧遊爭唱柳屯田好句  
汴州原不及杭州

畫羅紈扇總如雲細草新泥簇蝶裙孤憤何關兒女事  
踏青爭上岳王墳

圍香築玉賈秋壑鍊汞燒鉛葛稚川一片初陽臺上月

照他富貴與神仙

刺史笙歌學士禪倪迂楊鐵竹枝篇只今耆舊無新語  
風月銷沉四百年

西湖竹枝

國朝

施閏章

蘇公隄下水盈盈採蓮歌罷露沾襟藕絲寸寸偏難斷  
蓮子房房各有心

外湖遊遍裏湖遊南北高峯水面浮弱柳新裁成絮少  
不教飛去惹人愁

西湖櫂歌詞

國朝 查慎行

草色纔青柳未齊  
石函橋北斷橋西  
琉璃一片樓臺影  
過盡笙歌十里隄

萬葉千花綴彩棚  
火蓮龜背吐層層  
不知白日長多少  
又點湖心照夜燈

蜂喧蝶鬧奈春何  
拂面風香過綺羅  
此意少年應未會  
第三橋畔落花多

弄潮天氣中秋後  
競渡風光午日前  
併與西湖作寒食

人生行樂趁今年

夏日泛舟湖心得六絕句

臣  
錢陳羣

水晶宮在碧瑤天  
疑泛靈槎近日邊  
重到銀河看清淺  
便教人喚水中仙

倒影晴峯一萬層  
波紋風細研吳綾  
六時最愛篷窓坐  
欲唾何人可尚能

匝地清陰四面垂  
火雲飛不到湖湄  
遊人磅礴忘歸處  
賴背三農渴雨時

鏡面山容迹豈陳由來一覲有前因他生未要隨明月  
乞與湖中作槩人

晚涼暑氣欲全消又聽笙歌下六橋未許篙師促歸去  
有荷花處且停橈

安知客也非蘇白自笑吾耶亦水雲縱復明朝京洛去  
青衫猶欲帶餘芬

時余將  
赴闕

西湖雜句

臣 沈德潛

六橋楊柳罨輕煙細雨絲絲泛畫船乍識淡粧西子面

亂頭簷服更天然

意行初過望湖亭  
教伎樓邊步暫停  
禪榻鬢絲空學道  
閒情猶問舊西泠

晚風颯颯林端生  
雷峯塔前夕照明  
南屏鐘動鳥飛絕  
人在亂山缺處行

數聲柔櫓掠波還  
暮色蒼然滿四山  
勘破西湖塵土夢  
夜涼月白話禪關

西湖嬉春詞

臣  
沈德潛

十里長隄徧種花花間搖颺酒帘斜大蘇風流人不識  
偏問西泠蘇小家

隄邊女兒試春衣三三五五映芳菲錢王遺事人能說  
猶唱花開緩緩歸

葛鵲舊為師相宅半間堂外斷人行蟋蟀鬪餘軍務了  
不應更說救樊城

鳳凰山頭日欲曛銅駝石馬卧寒雲曾下初明眼中淚  
錢家宮殿趙家墳



上天竺是古禪林歷代官家勅賜金一路如花望空拜  
曾聞井裏現觀音

九里松邊也種桑春深一路看蠶忙聽罷湖隄簫鼓沸  
小姑又祭馬頭孃

西湖觀燈船煙火恭紀

臣傅王露

帝燭輝煌徹斗南瑞光分照萬人歡昇平樂事豐年兆  
併與湖山作大觀

春星萬點聚南屏戴首神鼇翬扇靈五色雲中聞笑

語

天顏有喜奉

慈寧

六六湖橋裏外通  
珊瑚迸裂水晶宮  
湖心幻出全湖景

萬樹桃花是火紅

金牛背上燭龍燃  
五夜真同不夜天  
自是湖光應明聖  
不須疑鬼更疑仙

詞

憶西湖

望江南

唐

白居易

江南憶最憶是杭州山寺月中尋桂子郡亭枕上看潮頭何日更重遊

錢塘形勝

望海潮

宋  
柳永

東南形勝三吳都會錢塘自古繁華煙柳畫橋風簾翠  
幙參差十萬人家雲樹遶隄沙怒濤卷霜雪天塹無涯  
市列珠璣戶盈羅綺競豪奢重湖疊嶂清佳有三秋  
桂子十里荷花羌笛弄晴菱歌泛夜嬉嬉釣叟蓮娃千  
騎擁高牙乘醉聽歌鼓吟賞煙霞異日圖將好景歸去

鳳池誇

懷舊

行香子

宋  
蘇軾

攜手江村梅雪飄裙情何限處處銷魂故人不見舊曲  
重聞向望湖樓孤山寺湧金門尋常行處題詩千首  
繡羅衫與拂紅塵別來相憶知是何人有湖中月江邊  
柳隴頭雲

觀潮

瑞鷓鴣

蘇軾

碧紗影裏小紅旗儂是江南踏浪兒拍手欲嘲山簡醉

齊聲爭唱浪婆詞 西興渡口帆初落  
漁浦山頭日未移 儂欲送潮歌底曲  
樽前還唱使君詩

游湖

柳梢青

宋 曾 覲

湖岸千峰嵌巖隱 映綠竹青松  
古寺東西樓臺上下煙霧冥濛  
波光萬頃溶溶人面與荷花共紅  
撥棹歸歟 一天明月十里香風

與客遊西湖

小重山

宋 辛棄疾

綠漲連雲翠拂空 十分風月處  
著衰翁垂楊影斷岸西

東君恩重且教種芙蓉  
十里水晶宮有時騎馬笑兒  
童殷勤却謝打頭風船兒住且醉浪花中

南屏晚鐘

齊天樂

宋  
陳允平

赤欄橋畔斜陽外臨江暮山凝紫  
戲鼓纔停漁榔乍歇  
一片芙蓉秋水餘霞散綺正銀鑰  
停闕畫橈催艤漁板  
敲殘數聲初入萬松裏  
坡翁詩夢未老翠微樓上月  
曾共誰倚繡苑煙花莓墻露草幾度  
西風彈指黃昏盡  
也有眠月間僧醉香遊子驚嶺猿啼喚人吟思起

浙江觀潮

謁金門

宋

周密

水天碧染就一江春色  
黿戴雪山龍起蟄快風吹海立  
數點煙鬟青滴一杼霞綃紅濕  
白鳥明邊帆影直隔江聞夜笛

兩峯插雲

木蘭花慢

周密

碧尖相對處向煙外挹遙岑  
記舞鷺啼猿天香桂子曾去  
幽尋輕霽易晴易雨看南峯淡日  
北峯雲雙塔秋擎露冷亂鐘曉送  
霜清登臨望眼增明沙路白海門青

正地幽天迥水鳴山籟風奏松琴虛楹半空聚遠倚欄  
干暮色與雲平明月千巖夜午遡風跨鶴吹笙

西湖月下

賀新郎

宋

史達祖

同住西山下是天地中間愛酒能詩之社船向西冷佳  
處放塵世必無知者暑不到雪宮風榭楚竹忽然呼月  
上被東西幾葉雲縈惹雲散去笑聲罷清樽莫為嬋  
娟瀉為狂吟醉舞毋失晉人風雅踏遍橋頭楊柳影不  
聽漁樵閒話更欲舉空杯相謝北斗以南如此幾算吾



曹便是神仙也問今夜是何夜

西湖

多麗

宋

石孝友

晚山青一川雲樹冥冥正參差煙凝紫翠斜陽畫出南  
屏館娃歸吳臺遊鹿銅仙去漢苑飛螢懷古情多憑高  
望極且將樽酒慰漂零自湖上愛梅仙遠鶴夢幾時醒  
空留得六橋疎柳孤嶼危亭待蘇隄歌聲散盡更須  
攜酒西泠藕花深雨涼翡翠菰蒲軟風弄蜻蜓澄碧生  
秋闌紅駐景采菱新唱再堪聽一片水天無際漁火兩

三星多情月為人留照未過前汀

中元湖上觀水燈歸宴楊氏山樓

婆羅門引

元  
張翥

暮天映碧玻璃十頃藥珠宮金波湧出芙蓉誰喚川妃  
微步一色夜粧紅看光搖星漢起舞魚龍月華正中  
畫船漾藕花風聲度驚簫縹緲雁柱璫瓏酒闌興極更  
移上瓊樓十二重殘夢醒烟水連空

岳武穆祠和韻

滿江紅

明  
夏言

南渡偏安瞻王氣中原消歇嘆諸公經綸顛倒可憐忠  
烈曾見淒涼亡國事而今惟有西湖月覩祠宮宰木尚  
南枝傷心切 人生易頭如雪竹簡汗青難滅拄乾坤  
要使金甌無缺后土漫藏遺臭骨龍泉恥飲奸臣血恨  
當時無奈小人朋盈朝闕

蘇隄春曉

蝶戀花

明  
莫璠

十里樓臺花霧繞宜雨宜晴山色籠春曉楊柳梢頭殘  
月小海棠枝上猶眠鳥 蘭帳玉人初睡覺試問樓前

畫舫開多少報道尋芳人起早紫騮嘶過香塵道

兩峯插雲

蝶戀花

莫璠

南北高峯雲氣繞玉削芙蓉迥出青天表金碧浮圖瞻  
縹緲朱甍繡檻迎黃道下界紅塵飛不到東望彤庭  
日出扶桑曉願借謫仙希有鳥瑤笙吹上蓬萊島

平湖秋月

蝶戀花

莫璠

璧月沉輝湖淥靚一色玻璃倒湛山河影貝闕鱗宮明  
愈瑩人間無此清涼境笑擷芙蓉乘舴艋醉掬文漪

寒光搖動金千頃欲喚坡仙同賦咏桂花露濕衣襟冷

紫雲洞

青玉案

國朝

吳綺

遙看鳥道渾無路但一澗沿花去澗盡忽逢雲宿處藤蘿日月莓苔今古撐得青天住陰陰石磴鳴仙鼠百尺虬龍向人舞足下分明聞客語沾衣空翠濛濛烟霧忽作山中雨

春日憶西湖次陸蓋思徐竹逸倡和原韻

菩薩

蠻

國朝  
陳維崧

劃波曾向西泠去掠入綠痕難唾處踈簾雜眠鷗真成  
自在遊 如今佳興歇悶過春三月剛見摘蘭芽山邨  
又焙茶

過女教場

鷓鴣天

國朝  
毛奇齡

銀甲凋戈小隊工內家宣勅教從戎山蘿覆鏃縈金細  
野火燒旗閃幔紅 宮月靜障雲空鳳凰山下抱龍弓  
珠兜玉鞞圍營路小雨寒花何處逢

西湖早春

浣溪紗集唐

國朝

朱彝尊

雪帶東風洗畫屏

許渾

便教鶯語太丁寧

杜甫

看花多上水

心亭

張籍

隔岸春雲邀翰墨

高適

傍檐烟雨濕巖扃

韋莊

瓦

甌斟酒暮山青

崔道融

早秋西湖

南歌子集唐

朱彝尊

桂楫中流望

丁仙芝

荷花鏡裏香

李白

無數紫鴛鴦

余延年壽

嬋

娟江上月

劉長卿

拂羅裳

閻朝隱

題湖心亭

翠華引

國朝

徐鉉

絃管四時繚繞樓臺三面參差山色喜晴喜雨湖光宜

酒宜詩

臣謹按西湖題咏甚多不勝記載惟有與志事相發明者謹從舊志內錄出以備掌故資考鏡云



西湖志纂卷十二